


# EBÈLÙ, NSHAPÌTÀ MWINÂYÌ

 . . . mbwà kutàmba kumanya pa bìdì bitàngilà Mukalenge wetù mubènèshìibwe awu. Nenku ki kiipàcìlà kèètù—kèètù mu kudìsangisha kaaba aka, mmu kiipàcìlà aku, ne, mpindyewu, ne bwà kusambidila bânà bàà Nzambi bàdì bàsaamà. Nènku mu dinda emu tudi bapetè mu Mifùndu di—dibènèsha dilenga dya kacya.

<sup>2</sup> Tudi tuteeta kwangata, dîbà dyônsò dya disangisha, citùpà cya . . . Ndi munkaci mwa kulongesha pa Mukàndà wà Ebèlù, wutùdì tulonga, munda mwa ndambù wa mbingu mishààle eyi mpindyewu. Nènku mpindyewu, bu Mukalenge mwa kwanyisha, netùtungunukè mu diisàtù dilòòlò, pashiishe mu dyàlumingu mu dinda ne mu dyàlumingu dilòòlò, mu, bwa pàcìdibi bikèngela bwa mèmè kwikala kaaba aka mu cikondo eci apa. Kî nditàbuluja to, kàdì nditàbuluja's, disangisha mu malòòlò ètù a ciibidilu. Nènku tudi ne disànkà dyàbúngì be, be pa dîbà edi bwa kudìsangishakù ne balundà beetu bîmpè bàà mu bimenga bya mu nyùngulukilu emu, ne mu nyùngulukilu wa Bimenga bya Bibila emu. Kàdì bu—bu byôbì byenzèke ne túbìshipè anyì cintu kampànda, mbifwànyìne kwikala ne Mukalenge àtùlombòlè, kàtààtakà, bwa . . . pàmwàpa tudi bafwànyìne kwangata ndambù wa malòòlò, pàmwàpa, mu nzùbù wa diibidija dya mubidi anyì cintu kampànda, paanyimà pàà mutanci, byôbì bimwèka ne Mukalenge ùdì ùlombola mushindu awu, mu mwaba wutùdì bafwànyìne kusangishilamù bantu beetu.

Kàdì tuvwa bamòne bantu bàlwa, bààlukila, bàmba ne: “Kakùvwa mwaba wà—wà kubwela mwinè to.” Mu bushùwà bwa bwalu, tabernacle mmukese be. Myaba ya kusòmba yìdì anu bwa bantu bakese menemene, menemene, kàdì tudi anu ne disànkà dya ne nudi baswè bwa kulwa kusòmba mu luuyà lukolè, bwa kutèèleja Dîyì dya Mukalenge. Nènku tudi tusambila bwa Nzambi wànùbènèshakù byàbúngì, bya biyiila ne panshì ne wànùkwàcishakù.

<sup>3</sup> Nènku mpindyewu, dilòòlò edi, tudi baswè, tudi tubanga ne nsha- . . . mwi<sup>4</sup>. Mbanganyì bàvwàpu mu dinda emu? Tùmònààyibi byanza byenu. Kaa, abi's mbilenga be, pàmwè ne nwènú bônso's. Nènku tudi pa, tubangila pa, nshapità mwi<sup>4</sup> wa Mukàndà wà Ebèlù. Kaa, Mukàndà mulenga kaayi's wè! Wùdì wùnùsànkisha anyì? [Disangisha didi dyamba ne: “Amen.”—Muf.] Nènku ndipàlakaja dya Mufùndu ne Mufùndu.

<sup>4</sup> Nènku Pòlò, kumpàla mene kwà kufilayèku bujaadiki bwa dilabula dyèndè, byàkakèngela bwa kwanji kuyayè mu Arabie bwa yèyè kujandwila ku Dîyì, ní cìvwa Bulelèlà. Ntu mèmè

muswè nàнку awu. Nènku dileesònà dya mu dinda emu edi, twásangànyì, mu dilongesha dya mu dinda emu adi ne, Kilistò ùvwà umwèumwè awu makèèlèlè, leelù, too ne kashidi. Ne Pòlò wàkasangana ne Dikunji dya Kapyà òmwèòmwè dyàkalombolà bânà bàà Izaleela adi, ndyàkatwilanganà nendè mu njila wa ku Damàsèkè adi. Twásangànyì ne Dikunji dya Kapyà, dyàkalombolà bânà bàà Izaleela mu cipèèlè, too ne ku buloba bulaya adi, ndyàkatwilanganà ne Pòlò mu njila wa ku Damàsèkè adi, ne kuDìbìikilaYè ne, “Yesù.”

5 Dìbà adi tudì tujandula Buzambi butàmbe kutùmbuka bwa Yesù Kilistò. Mukàndà ewu mu kaabujimà wùdi anu dibuuludiibwa dya Yesù Kilistò. Ne Yèyè wàkalwa, mutwásangànyì ne: “Mu bikondo bya kale ne mu mishindu mishìilèshìilàngàne, Nzambi wàkaakwila ne baataatù kùdì baprófetà; mu matùkù a ndekeelu aa ku Mwan’Èndè, Yesù Kilistò, mmuDìbuulùle Yèyè mwinè.” Ne Mukàndà kubangila anu ku Genese too ne ku Bwàkabuulwibwà wùdi anu dibuuludiibwa pa dyòdì dya kashèndèndè, dya kacya dyàngatangana, dya Mukalenge Yesù.

6 Ne tudì tusangana ne Yèyè Nguvwa mu kaacipuka kàvwà kàlàkukà kapyà awu. Tudì tusangana ne Yèyè Nguvwa ne Nzambi kumpàlà kwà difùkà dya dyulu ne buloba awu. Ne tudì tusangana ne, mu Dipungila Dipyadìpyà, Yèyè ùvwà Nzambi ne Muntu, pàmwè. Ne pashìishe pààkuumukàYè mu Dipungila Dipyadìpyà, bwa kuya mu Dyulu, Wàkamba ne: “Ndi mufùme ku Nzambi, ne Ndi ngaalukila ku Nzambi.”

7 Ne pashìishe pààkatwilanganà Nendè Pòlò, Ùvwà mu mmwènekèlu umwèumwè uvwàYè pààkalombolàYe bânà bàà Izaleela apu, Dikunji dya Kapyà. Ne Pòlò wàkaMutàngila buludì mu mpàla, mwikàle kàyi mukùdimùne mucìma, ki cyòcì kumupetèsha disaamà dya mèsù matùkù èndè ònsò a mwoyi àkashààlà. Wàkashààla mpofo, ne munda mwa matùkù mulongolongo kàvwakù mwa kumòna cintu nansha cìmwè to. Byàkakèngela bwa kuyabò bènda bàmulombola too ne ku mùsèèsù wùvwàbò bàbìikila ne Mululàme awu.

8 Ne Nzambi ùvwamù ne muprófetà wàkaakulaYè nendè, dyèndè Ànaanìyà, wàkalwa, ku cikèènà-kumòna, ne kutentekelayè Pòlò byanza, kwambayè ne: “Mwanèètù Shawùlà, petùlùlè lumònu.”

9 Ne dìbà adi, tudì tusangana ne, Nyumà Mwìmpè umwèumwè awu, Mukalenge Yesù Kilistò umwèumwè awu, wàkalwa kùdì Peetèlò mu mmwènekèlu wa Bukènkè ne wàkamusùngila kumupàtula mu bùlokò.

10 Ne tudì tusangana ne Mukalenge Yesù umwèumwè awu, mu matùkù aa, ùcidi anu mu Dikunji dya Kapyà òmwèòmwè (Bukènkè) didì munkacì mwa kulombola cisàmbà Cyèndè (Ekeleeziya Wendè) adi, dyènza cintu cìmwècìmwè aci, difila

bikèènà-kumòna; tulwa tutentekela bantu byanza, ku cikèènà-kumòna. Mukalenge Yesù, Úvwa mutwilàngàne naanyi mu dyàlumingu dishààle mu dinda kwànyì kumbèlu, wàmba ne kùvwa kùlwa muntu mulùme, wa nsukì mifiike, yènda yilwa myva. Úvwa mwena Ngelikà. Mukàjèndè ùvwa mushindàme, ne ùvwa mwa kudila mwadi ku cyoshelu.

11 Bàmwè bàà kùdìbo bàkaaywa bacilondèlàngàne, ne bamanyè ne civwa mwa kwenzeka. Úvwa eku mucibùkile panshi, eku ne—ne kajilujilu kajaalamiji kàà mu mutù wèndè kamanè kufwà. Kàvwa mene nansha mwa kwikala ne bukòntononyi bwa makàsà anyì bidimba byèndè to. Kabidi ùvwa mpofo. Ne bwa kucivwija cileeki pàbidi: mvwa mwambile inàbànzà mukese kampànda bwa kwanjìyè kulwa dyàmbedi, bwa kusambidila babèèdi, pashiishe mèmè kukùdimuka kàdi kwambila Mwanètù Thom bwa kulwayè kusambila. Ne twètù, basòmbe kaaba aka, tubandila mùvwàci cyènzeka. Ki pashiishe mèmè kutùluka kuya kasambidila babèèdi, ne kwalukila. Ki mukàji awu kulwayè, anu mùvwà cikèènà-kumòna aci menemene, ne kunkwátayè ku dibòko ne kwasayè mwadi, ne kwambayè ne Docteur Ackerman nguvwa mubàtume kaaba aka. Docteur Ackerman mmulundà wanyì wa pa mwoyi, mwena Katolike. Mwanèndè wa balùme ùtu nsaserdose ku cisòmbedi cya badyàmbike balùme ku—ku Saint Meinrad, mu Indiana. Ne mwinè muntu ewu ùvwa wa mu Jasper. Ki Mukalenge kumwondopaYè, kumujuulayè mu dikalù adi. Kujuukayè e kwendelayè kuulu. Úvwa mwa kumòna bìmpè anu mùdi muntu kanà yònsò ewu. Ki kupàtukayè mu citanda wènda wènda, mujimà anu mùdi bantu bònsò emu. Byònsò abi ku cikèènà-kumòna's!

12 “Mwanètù Shawulà, Mukalenge Yesù udi mukumwènèkèle mu njila awu, mmuntùme bwa nkutentèkèlè byanza, bwa ùpetululè lumònù ne ùjiibwè tètè ne Nyumà Mwìmpè.” Bilenga be.

13 “Pashiishe tudi tusangana ne, bu mutùdi ne lupàndù lunène elu, kabivwa bikèngela bwa twètù. . .Katwèna bafwànyine kupànduka ku manyooka ne ku ciiji cicolè cya Nzambi, twètù balèngùlùle lupàndù bunène nùnkù to.”

14 Mpindyewu netùbangè kubala, dilòòlò edi, mu, ne netùbangè nshapità mwi4 wa Mukàndà wà Ebèlù. Muntu yèyè muswè kwenda kulondesha, tudi ne ndambù wa Bibles kaaba aka. Yèyè nendè dijinga, mòna's, umwe wa ku baawisiyè nèakutwàdilèye, bu wèwè mwa kulama cyanza cyebe cyela muulu, Bibles eyi—eyi. Bu umwe wa ku bàna bèètù bàdi kaaba aka aba mwa kwangata. . . Kùdi Bibles yibidi mitèeka pàapa, ngeela meeji.

15 Nènku mpindyewu netùlwijakajè, bwalu tudi ne meesa a Mukalenge paanyimà pàà katanci ndambù. Ne mwaba wutwimanyinà dilòòlò edi awu, mu diisàtù dilòòlò

netùbangululè. Mpindyewu, ngeela meeji ne, mu dinda emu mu kubala kwetu, tuvwa babangile ku mvensà wa 15.

<sup>16</sup> Muntu, pàmwápa kàyi mumanyè ne ntu ngaasa binetè to, bwa kubala naabi. Nkààdi nkùlakaja's. Kàdi ncidi anu mwa kubala, kàdi ncyèna mwa kubìjingulula ne lùkàsà to, nangànangà pàdìbi ne tuntu tùndi mbala ntwa tukese kaaba aka, tuntu tufùnda twà tukese.

<sup>17</sup> Nènku mvwa muyè kaditeetessa mèsù, bwa kumòna ní ncyà bushùwà ne nkààvwa njimija lumònù lwànyì. Mèsù àànyì àvwa dikumi pa dikumi. Kwambayè ne: "Kàdi ukààdi mupìcishe bidimu makumi anaayi's, mwanàànyì." Yèyè kumpèèsha cintu cya dibala, yèyè ne: "Bangààku kubala aci." Mèmè kucibala. Ki mèmè kutungunuka ne kuciseemeja pabwìpì, kutàmbabi kuya bitekète bitekète. Ki kulwatù bu nùnkù ewu, mèmè kwimana. Pashiishe kutèekayè mwaba awu mu dikumi pa dikumi, mvwa mwa kutùbala nànsha piikàle penyì. Kàdi kwambayè ne: "Bidi ne, paùdi upicisha bidimu makumi anaayi, mpàdi tumònyì twèbè twà mèsù túbèetelela."

<sup>18</sup> Mpindyewu, ndi mwa kuvinya mèsù kàdi kubala anu pabwìpì naanyì mushindu ewu, kàdi bikèngela mvinyè mèsù. Pa nànkù, kungenzelayè anu binetè's. Ndi mwa kutùmòna, mwaba kanà wònsò, pàditu pabwìpì naanyì menemene. Mpindyewu, pàditu tuseemena kule naanyì, ncìyikù mwa kumòna to ne bintu ebi. Kàdi ndi ntùbala, mbadila apa ne binetè ebi.

<sup>19</sup> Mpindyewu, mu dinda emu, tuvwa bangàte citùpà cya ndekeelu cya nshapità mwi3 wa Ebèlù. Nènku, kaa, misà bulenga kaayì yitùdi tupeta's wè! Mpindyewu tèelejààyi, ndi muswè kubalulula, bwa tùpetè mpindyewu pàa kushindamijila bitùdi twamba. Kí nkwakulapù to, kàdi anu kucikenketululakù ndambù.

*Pàcidìbi byambùbwe ne: Leelù ewu nwènù . . . bumvwè diyì dyèndè, kanùpapishi myoyi yenu mwàkadìbi mu diyòbola to.*

*Bwalu bàmwè, bòbò abu's, bàakumvwa Diyì, pàakamanàbo kumvwa Diyì, bàakamuyòbola: kàdi pààbì kì mbònsò bàakapàtuka mu Èjiiipitù ku bulombodi bwa Mòsà to.*

<sup>20</sup> Mpindyewu, mu aci, mu dinda emu, tudi tusangana ne Yèyè mmwambè ne: "Mpindyewu kanùpapishi mwoyi wenu to, bu mwàkadìbi mu matùkù a diyòbola." Apu mpàakafiikishàbo Nzambi munda ku mayòbò, bwalu Yèyè wàkabàpèèsha Mòsà, mupròfetà Wendè, ne cimanyinu cìvwà kùdi Mòsà. Mbanganyì, bàà mu kàlaasà aka dilòlò edi, bàdi bamanyè cìvwà cimanyinu aci? Dikunji dya Kapyà, Ebèlù 13.

<sup>21</sup> Mpindyewu, katwèna bamanyè disangisha ní divwa dimòna cimanyinu aci anyì kadìvwa dimòna. Kàdi Mòsà ùvwa ùCimòna, bwalu Mòsà yèyè wàkadyànjila kutwilangana Nendè mu

kaacipuka kàà kàlàkuka kapyà. Yèyè ùvwa Kapyà. Nènku bânà bàà Izaleela bààkatumikila Mòsà, ne bààkuumuka mu Èjiipitù. Nènku mbenzè anu bàpàtuka mu Èjiipitù, Nzambi, mutùdi tusangana's, wàkabàlombola buludi e kubàbweja mu butèyi. Mùvwà, cilwilu cya Pàlò paanyimà pààbò, Mbú Mukünze ku luseke ne ku luseke, ki Nzambi kubèèlaYè ku diteeta's; ki kukwàcikabò bwòwà. Ki aci kuyòbolaci Nzambi's. KwambaYè ne: "Cyùdi uNgeelela mbilà ncinyi?" Yèyè ne: "Akùlà anu cyaànà ùye kumpàla." Mèmè ndi munangè aci.

<sup>22</sup> Mpindyewu, bàvwa bènda bàlonda Mòsà, pàvwa Mòsà wènda ùlonda Dikunji ne Ditutu apu, ne bàvwa mu njila batàngile ku buloba bulaya. Cimfwànyì cilenga cya Èkèleeziyà, dilòlò edi, twètù mu njila batàngile ku Buloba bulaya, balombola kùdi Nyumà umwèumwè awu, bimanyinu ne maalu a kukèma bimwèbimwè abi mwàkabyàmbà Nzambi.

<sup>23</sup> Mpindyewu tàngilàayi. Pashiishe, kufikabò mu Cipèèlà cya Sìnà. Mâ—mâyì àvwa ne "bululu," *Maalà*. Nzambi wàkabàlombwela ku màyi a bululu bwa cinyi? Bimwèka ne Yèyè nùku's mmubàlombwèle ku màyi mimpè. Kàdi Yèyè kubàlombwela ku màyi a bululu bwa Wàmòna mwa kujaadika diitabuuja dyabo. Yèyè ùtu munangè kucyènza. Ùtu munangè kulekela makènga àkukwàta, bwa kuleeja ne Yèyè ùdi mwa kukuleeja dinanga Dyèndè ne bukolè Bwèndè. Mmunyi mùdi bantu, leelù ewu, bàdi kabàyi bìitabuuja dyenza dya bishimà dya Nzambi, pàdi makènga àlwa, bumba babilekela bàya? Kàdi twètù tudi twitabuuja ne "Nzambi ùtu wènza bishimà." Yèyè kèna mwa . . . Nzambi ùdi ne . . .

<sup>24</sup> Tèèlejàayi eci. Nzambi Yèyè kàyi wènza bya mwomùmwe to, pàdi maalu àmwèàmwe awu àjuuka, díbà adi Nzambi's mmupiiile ne kàsungànsungà kùdi bantu Bèndè. Budishikaminyi bwa Nzambi bùdi bùlòmba bwa kukwàtaYè mudimu mu kantu kònsò anu mwàkenzàYe musangu wà kumpàla amu, bwa cyaànà Yèyè ùvwa mutùpàkàne pàkenzàYe musangu wà kumpàla apu. Nzambi Yèyè kàyi mwenzè mushindu wùmweùmwe wàkenzàYe musangu wà kumpàla awu, Yèyè mwenzè bishiilàngàne pa musangu mwibìdi, díbà adi Ùvwa mwenzè bibi pàvwaYe mwenzè musangu wà kumpàla awu. Byòbi ne Nzambi wàkondopa babèèdi mu Dipungila Dikùlukulu, bikèngela Ácyènzè mu Dipungila Dipyadipyà ne leelù ewu, bwa cyaànà Ùvwa mutùpàkàne pàakabòndopàYe kuntu kwàka apu. Bikèngela Ènzè mushindu wùmweùmwe awu, musangu wònsò. Ne Yèyè neàcyènzè, pàakùmbajà diitabuuja dimwedimwe adi mushingà awu. Cilèma cidi kutùdi twètù, kí nkùdi Nzambi nànsha. Bwalu tudi tuMumòna kùdi bàmwè, ne bàabùngì, wènza bishimà binènè bya bikèmesha. Aci tudi bamanyè. Mudyudi kèna mwa kwamba ne: "Kabyèna nànkù" to. Bwalu tudi tumòna Cicijaadika, s'ki cyòci aci.

25 Kale wàwa bàvwa bàmba ne: “Ndeejè cishimà.” Kabàcyèna kabidi mwa kwamba aci to. Maalu a mamanya kaèna kabidi mwa kucyàmba to. Kakùyi mpatà to tudi mwa kucijaadikila beena maalu a mamanya. Ne beena maalu a mamanya bàkaadi bafile bujaadiki ne Kampànda wa mutàmbe-mfùkilu, mu mmwènekèlu wa Dikunji dya Kapyà, ùdi neetù. Fòtò Wende’s nyèyè ewu, kaaba aka mene, ne umwe mmukùdika mu Washington, DC, dilòòlò edi. N’Kilistò umwèumwè awu.

26 Ki bwa cinyi, kùkaadi cikondo, bambi naanyi bàvwa ne ciibidilu cya kungambila ne: “Kaa, Mwanèètù Branham, awu’s ndyabùlù. Kùjìmijikù dîbà ne abi to.” Kunkwàcishabi bwòwà.

27 Nènu ncyàkaswà kuciyiisha to, too ne pààkalwà Nzambì kucibùulula, ne: “Yèyè ùdi Yesù umwèumwè awu, Yèyè umwèumwè awu.” Kaa, dîbà adi wèwè uteeta kucinyùkusha bwa kucimpàtula anyi? Kaciyi mwa kwenjiibwakù to. Bwalu, m’Mufundu. N’Diyi dya Nzambì. Kacyèna anu dilabula cyanààna dya didilekèlèlè to. Ndilabula didi Diyi dya Nzambì ne mlayi wà Cyendelele mubènesha wa Nzambì bitwè nyama ku mikòlò.

28 Mpindyewu, tudi tumòna kaaba aka, dîbà adi ne, Yèyè ngudi mwambè.

*Bwalu bàmwè, pàakatèèlejàbo, bààkayòbola: . . .*

Cya bushùwà. Bòbò mbàvwà bàcyòka’s, musangu wònsò wùvwàbò bàfika mwaba wùvwà diteetangana dya makànda dilwa. Dîbà adi bàvwa bènza cinyi? Bàvwa bàbinduluka, ne bàteketa mu mabòko, ne bàswa kutwà cimpìngà, ne: “*Cikampànda* eci ncingenzèkèle bwa cinyi?”

29 Cintu cya pabwàci, mu dindà emu, paanyimà pàà mèmè muyiishè aci ne mwànyi mwònsò, nkulwè bààbùngi ku cyoshelu ne beelèPu nkonko ne: “Eci cidi cingenzekela bwa cinyi?” Nudi numòna muyaayàCi anyi? Cidi cìpicila bantu pa mitù’s. Bidi anu mwomùmwè’s, bantu.

30 Yesù wàkamba ne: “Nudi ne mèsù, kàdi kanùyì mwa kumòna to.” Bayiidi mbàakambilàYe aci.

31 Bààkamba ne: “Mònaaku, mpindyewu’s nyawù Ukààdi wakula patòòke. Bwa mpindyewu twitàbùùjì. Kabyèna bìkèngela bwa muntu nànsha umwe àKwambilè cintu to, bwalu Nzambì ùdi ùKuleejaci.”

32 Yèyè ne: “Mpindyewu nwitàbùùjì ambà’s, paanyimà pàà cikondo cyònsò eci?” Nwamònu anyi?

33 Kwèna ne cya kwela nkonko nì mpa cinyi nì mpa cinyi to, kùdi Nzambì. “Bwalu makàsà a baakàne mmalombola kùdi Mukalenge.” Ne diteeta dyònsò didi dikwela pambidi adi, mbwa kukuteeta. Ne Bible mmwambè ne: “Àdi bwebe wèwè ne mushinga kutàmba wà ngòlò.” Pa nanku pàdi Nzambì ùlekela ndambù wa tuntàtù tupeepèle atu tükukwàta, vùlukà

ne, mbwà dikulongolola. “Mwânà wa balùme yònsò udi ulwa kùdì Nzambi ùdì ne cya kwanji kunyookiibwa dyàmbedi kùdì Nzambi, ne kuteeciibwa, kulongeshiibwa bu mwânà.” Kakwèna bya dishiya muntu to. “Mwânà wa balùme yònsò udi ulwa.” Nenku ntàtù eyi yidi yènjiibwa, yidi yitwadiibwa, mbwà kumòna lwidi luwàngatà. Nwamònu anyi? N’Nzambi awu, mu cyalu cya diteetelangana eci. Ki cyònsò cidì pànwapa apa, pàdi anu cyalu cya diteetelangana, ne mwaba wùdì Ye ùteeta kukuteetela.

<sup>34</sup> Mpindyewu tèelejàayi, pàtùdì tutungunuka apa. Kàbidì ndi muswè kwangata citùpà cyèndè cya ndekeelu.

*Ne mbangayi bàakadicipilaye ne kabàvwa ne cya kubwela mu diikisha dyèndè, . . .*

Mpindyewu, ki kutùdì tukafika nkwòkù aku, dilòlòlò edi.

*. . . mu diikisha dyèndè, pìikalàbi ne kì ng’aba bàakabèngà kwitabuja?*

*Pa nànkù tudi tumòna ne bàakapanga kubwela . . . bwa bupidyà.*

<sup>35</sup> Mpindyewu, mpèkaatù ncinyi? Bupidyà. Nzambi ùvwa mulwè kùdìbo, mu Dikunji dyà Kapyà; mutùme mupròfetà Wèndè, ne mumulaabè, mumupèeshe bimanyinu bya kwenzayè kumpalà kwa cisambà. Ne pashìishe Dikunji dyà Kapyà, ku mupròfetà, kubàlombola bwa kupàtukabò. Bwalu bwònsò bùvwàbo bàtwilangana naabù, bàvwa bàbanga kunungana ne kwamba kaacilèma kakesè kònsò kàvwàbo bàpeta kùdì Mòsà, bàbanga kumudyula ne kumuputakaja. Ki kubìpilacì Nzambi, bwalu Wàkamba ne bàvwa bènzà mpèkaatù.

<sup>36</sup> Bìvwa bikèngela kwikalabò batèèlèje. Kàdi, pamutù pàà aci, kutèelejabò dilukakaja dya lungènyi ne: “Bìdì mwa kwikala bìshi’s? Maalu aa àdì mwa kwenzeka bìshi?” Pìikalàbi ne Yèyè ùdì Nzambi, byònsò’s mbipeepèle. Ne Yèyè’s neenzè bwa maalu ònsò àkwacishanganè bwa dyàkalenga dya bàdì baMunangè.

<sup>37</sup> Mpindyewu tudi tubwela mu dilonga dinène kaaba aka, mbwena kwamba ne, pa “Diikisha,” nsabatu awu. Mpindyewu, bàvwa beena lwendu mu lwendu lwàbò alu. Nwamònu anyi? Bàvwa mu Èjjiipitù mwàmwa, bidimu nkàmà yinaayi, mu bupika. Kàdi mpindyewu bàvwa bàbàpàtula ku bishimà bya Nzambi, bilondèshìle mulayi Wèndè. Nenku bàvwa mu njila batàngile ku buloba bulaya. Kàdi apa ki Bukènkè bwa butàmbe-mfùkilu bùdì bùmweneka ebu, munkacì mwabo, ne bùbanga kubàlombola.

<sup>38</sup> Mpindyewu, muntu ùvwa mwa kwamba ne: “Mpindyewu, tàngilàayi kùneeku, Mòsà mwinè ewu pèndè ki nganyi’s? Udi mukuvwijè mutùlombodi nganyi? Wèwè kwèna umwe wa kutùdì anyi? Udi mukutèèke apa bwa kwikala sheefù wetù ki nganyi? Udi wèwè wela meeji ne udi mumanyè kutàmba mpaasàtà wetù anyi? Udi wela meeji ne udi mumanyè kutàmba mwakwidi

anyi? Udi wela meeji ne udi—udi ne meeji matwè kutàmba batèndeledi bèètù, bàà ditùkù dyà leelù edi aba anyi?” Aci kacìvwà ne dipetangana naacì nansha òmwè to.

Ùvwà n’Nzambì, mu Dikunji dyà Kapyà, ùshìndika ne Yèyè nguvwa mu nkwaka awu. Kabìvwà ne cìvwàbì bìshintulula bwa ne uvwa ne meeji matwè nganyi ne uvwa kàyi meeji matwè nganyi to. Cìvwà ne bwalu mmwènenenu wa kulonda cìvwà Nzambi mutèeke kumpàlà kwàbò.

<sup>39</sup> Mòna’s, Mòsà, bwa mu mubidi emu, ùvwà mwenzè cintu cikùtākàne pàakateetāye bwa kusungila bānà abu ku Diyì dyà Nzambì, ùpātuka ne musùmbà wà bantu mu cipèèlà. Kàdi pèndè ne wendè . . . Mòna’s, yèyè’s ùvwà mupyānyì wa byònsò bìvwābo naabì. Cilwilu ne cilwilo cyònsò cìvwāku aci, pa buloba bujìmà, yèyè’s ùvwà mucìcimùne. Kàdi ki yèyè awu’s, kalààlà kanènè kàà māsàlaayì. Ne cidya cìvwà cìlondà, yèyè nguvwa ne cya kwikala mfùmù, Pālò wa Èjiiipitù. Mòna’s, nùnkù yèyè’s nguvwa mwa kwikala mubānde pa nkwasa wa butùmbi, ne mwambè ne: “Èyo, nwènù bānà, alùkìlà ndāyì kwènù.” Aci’s ncìmanè bwalu; yèyè’s nguvwa Pālò. Kàdi Mòsà . . .

<sup>40</sup> Kaa, ki bwalu mbwòbù ebu. Mòsà, ku *diitabuujā*, ùvwà yèyè ùmòna mulayì wà Nzambì. Ki Mwanjèlo wa Mukalenge kulwaYè kùdiyè, ki kumanyayè pa bìvwà bìtāngìlà Nzambì, mu tusunsa tùtaanu mu Bwikadi bwa Mwanjèlo awu, kutāmba mwākayìilāye munda mwa bidimu makùmi ànaayi ne balongeshi bàà mu Èjiiipitù. Kumanyayè ne Yèyè ùvwakù. Kumònayè citāmbe-mfùkìlu cyènzeka.

<sup>41</sup> KwambaYè ne: “Mémè nēngìikalè neebè Mòsà. Nénye kumpàlà kwèbè.” Ki kuumvwabò. Nènku kumupèèshaYè bimanyinu bya kwenzayè.

<sup>42</sup> Mpindyewu, bàvwà mu njila batāngile ku buloba bwa diikisha. Nzambì ùvwà mubàtèèkèlè diikisha, mwaba wùvwàbì kabìyì bikèngela bwa kwikalabò . . . benzejanganyi bàà midimu mikolè bàbākòòkesha, bàbàsàka, bwa kubènzeja maalu nansha.

<sup>43</sup> Cimfwānyì cilenga kaayì cìdici leelù ewu’s wè, patùdi tutāngìla èkèleeziyà ne tumòna èkèleeziyà mu ngiikādìlù wudiyè. Muntu yònsò udi mulediibwe kùdi Nyuma wa Nzambì ùdi ùkìna maalu a pa buloba: “Ne paùdi unanga maalu a pa buloba anyì bintu byà pa buloba, dinanga dyà Nzambì kadyèna nānsa munda mwèbè to.” Ki cìdì Bible mwambè ncyaci. Nenku mwena lwendu mulelèlā, mu njila wendè, ùdi yèyè ànu ùkìna bintu byà pa buloba. Udi ùkìna bwa kumòna bantu bānwā maalà. Udi ùkìna bwa kumòna bantu bānwā mfwankà. Udi ùkìna bwa kumòna bakàjì mu mùsèèsù, bavwàle tulāmbà twà kale twà bukooyà atu. Udi ùkìna bwa kumòna manāyì a bàtwa mibèlā ne a twartā.

<sup>44</sup> Kàdi makèèlèlā awu, pāvwa Mwanèètù Tony . . . anyì mèmè ne Mwanèètù Wood patùvwà tupicìla mu mùsèèsù, ne



bakwabo, bantu balùme bakwabo. . . Kùvwa inábànza mukese mu Louisville amu, wènda ùpweka ne mùsèèsù, mukàji mukese wa ùmwèka mulenga, muvwàle bilàmbà byènza ne bwôwà's; bibànde ànu ne mu cifùka emu, ne kaamukàbà kakese kaswika mu cifùka emu, ku luseke ne ku luseke eku, ne kapese kakese menemene kàà cilàmbà kavùngàmàne kumpàlà kwèndè, ne kaswikila paamyimà apa ne kaamwonji. Wènda ùpweka ne mùsèèsù, byenzè bwôwà's, ne muntu mulùme yònsò mu mùsèèsù amu ùmutàngila. Mémè kwamba ne: “Kí mmumanyè ne mmupùile to, ku mèsù kwà Nzambi, bwa dyenda dyà masandi ne mulùme yònsò udi mumutàngile mùshindù wàwa. Ne nealumbululè ku ditùkù dya cilumbulwidi bwa dyenda dyà masandi ne bóbò balùme abu.”

45 Yesu mmwambè ne: “Muntu yònsò ukàtàngidi muntu mukàji bwa kumwalakana, wàmanyi kwenda nendè masandi munda mwa mwoyi wèndè.” Ncyà bushùwà.

46 Pa nanku, nudi numòna's, Mwanèètù Wood kungambilayè ne: “Udi wamba pèèbè ne mbifùme ku cinyi, Mwanèètù Branham?”

47 Mémè ne: “Anyi ndishàadila dya mu byeledi bya meeji anyi ndikwàciibwa dyà kùdi demon.” Kùdi bintu anu bibidi bìdi mwa kucyènza. Mukàji wa nsòmbelu wa kaneemu ne mukezùke, kàakuvwàla bintu abi to ambà anu yéyè mukwàta kùdi démon's. Aci m'Bulelèlà menemene.

48 Mpindyewu, mwena lwendu udi mu njila mutàngile ku Dyulu, ùdi ne mwoyi mu cipaapu cishùlàngàne. Kabyèna bìkèngela bwa wèwè kuditàcisha bu yéyè mwa kutàngila mukàji awu to. Yéyè neatumè mpàla ku luseke piikalàye ne Nzambi mu mwoyi wèndè, bwalu yéyè ùdi ne mwoyi mu cipaapu cidì mu ntàntà wa mùlìyò wà kilòmèètà ne bintu abi. Ncyà bushùwà. Kí mbimpè wikalè mupùile ku bintu abi, ku cilumbulwidi to. Pa nànkù yéyè ùdi ùtùma mpàla ku luseke wamba ne: “Nzambi, ikàlàku luse ne mukàji wàwa,” pèndè kuya kùyaayàye. Twètù tudi mu lwendu. Tudi mu njila batàngile ku Buloba bwa Kaanàànà. Tudi mu njila batàngile ku Diikisha dya Cyendèlèlè ne dibènesha didi Nzambi mutùpèèshe. Nenku mu lwendu alu, tudi tuteeciibwa. Tudi tuteeciibwa kùdi bintu bya mishindù yònsò, kàdi nànsha nànkù tuteeciibwa katùyì twenza mpèkaatù to.

49 Mònaayaaku mpindyewu, patùyaayà ku nshapità mwi4 apa ne: “Kí bwa cinyi twikalàayi ne diciina.”

*Ki bwa cinyi twikalàayi ne diciina, bwa ne nkwepi, mulayi mutùshùla bwà kubwela mu diikisha dyèndè, . . .*

50 Ndi muswè bwa nwavùlukaayi, ne, anu twètù bajandùle, anu Nzambi mutùbuulwileci! Nànsha tuya mu èkèleeziyà bishi, aci kacyèna cìpetangana naaci to. Nzambi ùdi ne cyà kulwila ku

dibuulula ne kuDìbuulula kutùdì, aci ncìdì cyèla bintu byònsò bya pa buloba pambèlu. “Mpindyewu, pàcidìbì byambiibwe ne: ‘Leelù ewu panùdì . . .’”

51 Mpindyewu tubangààyaaku nshapità mwi4.

*Ki bwa cinyi twikalàayi ne dicìina, bwa ne nkwèpì, mulayi mutùshùila wà dibwela dya mu dyèndè . . .*

52 Mpindyewu vùlukàayi ne, pàvwàbo mu njila batàngile ku Diikisha, Dikunji dya Kapyà ndìvwà dibàlombolà. Mpindyewu tudi baswè kujandula ne: “Diikisha edi ncinyi?”

*Twikalàayi . . . dicìina, bwa ne nkwèpì, mulayi mutùshùila wà kubwela mu diikisha dyèndè, (tàngilàayi), muntu nànsha umwe wenù kùkadi wàlwa kumwèka bu muwùpangile.*

53 Mpindyewu, ki mulayi ngwòwò ewu. Cìdì cikèngelà twètù kuciina ncyòcì eci: bu kwikàle kakùciyi kutùshààdìle mulayi. Kàdì kùdì mulayi! Ne pashìishe, cintu cìdì cìlonlà, kanwikadi nwàlwa kuwùpangila.

54 Mpindyewu, dyeji dìdì ne, pìikalàbì ne tudi mu njila batàngile ku Diikisha, Diikisha ncinyi? Dìdì penyì? Ndiya kashààla wa ku èkèleeziyà anyi? Nkubàtìijìibwa mùshindù kampànda anyi? Nkulwa cidimba cya èkèleeziyà wa mutàmbe bunène mu cimenga anyi? Nkuvwàlà kwà bilàmbà bya bitàmbe bulenga anyi? Ndilonga dya tùlaasà anyi? Mfrangà anyi, bwa tùlekelè kwenza mudimu tùshaalè anu badyàdìje panshì cyanàànà, kwikisha matùkù ètù ònsò àdì matùshààdìle, mutùtù tudìbiikila amu anyi? Kí ng’adi nànsha.

55 Tèelejàayi cìdì Bible wàmba ne ki cidìdì, ne mutùdì tudìpeta.

*Ki bwa cinyi twikalàayi ne dicìina, bwa ne nkwèpì, mulayi mutùshùila wà kubwela mu diikisha dyèndè, muntu nànsha umwe wenù kùkadi wàlwa kumwèka bu muwùpangile.*

*Bwalu kutùdì (ditùkù adi musangu awu) nkùvwà èvànjeelìyò muyiishùbwe, ne kùdìbo pààbò; . . .*

Èvànjeelìyò ncinyi? Luumù lwìmpè. Luumù lwìmpè lwàkalwa kùdìbo mu Èjìipitù, ne: “Nzambi mmutùme musùngidi, ne Yèyè ngwatùpàtula ne kuya neetù ku buloba bulaya.”

56 Luumù lwìmpè kutùdì mpindyewu, lùdì ne: “Nzambi mmutùme Musùngidi, Nyumà Mwìmpè, ne tudi mu njila batàngile ku Buloba bulaya.” Mpindyewu bantu mbacìvwijè twitabàayi ne màngumba, kàdì Nzambi ùcìdì anu mwimànyìne, pa ne, dyètù *Diikisha* n’ “Nyumà Mwìmpè.”

57 Mònaayi.

...nkùvwa èvànjeeliyò muyiishùbwe...kùdìbo ne mùdì kutùdì pèètù: kàdi dìyì dyàkayiishùbwà adi kadyàkabàkwàcisha to, dyòdì...

Vùlukààyi:

...dìyì dyàkayiishùbwà adi kadyàkabàkwàcisha to, kadiyì disambàkàne ne diitabuuja munda mwa bààkaditèèlejà abu to.

58 Kaa, bânà bèètù wanyi, lekèlaayi ngãnji ngiimanèku apa bwa katanci kakesè. Dìyì nànsha diyiishùbwe munyi, nànsha wèwè unanga mùshindù wùdìDi diyiishùbwe, wèwè mwine kùyi ulwa mwabanyanganyi wa Dyòdì adi to, kaDyàkukukwàcishakù to nànsha kakesè.

...kadiyì disambàkàne ne diitabuuja kùdì bààkaditèèlejà abu to.

59 Bààkamòna bishimà bya Mòsà. Kwambabò ne: “Bìdikù anu bîmpè’s.” Ki kulèngululabò. Bòbò—bòbò bààkamumòna wènzà bishimà. Ne bààkamòna Dikunji dyà Kapyà, pàmwàpa, anyi bààkumvwa bààkula bwàDì. “Kaa, mbîmpè be.”

60 Kàdi kacayàkasambakajiiibwa ne diitabuuja dyà muntu sungasunga to. Bwalu mbenzè anu bàfiika mu cipèèlà nùku, bòbò (muntu ne muntu) bààkabanga kunungana. Ki Nzambi kwambaYè ne: “Bwalu bèdì mpatà, cìvwa mmpèkaatù.” Kanwèdì cintu nànsha cimwè mpatà to. Itàbùùjaayi. Kanwèdì mpatà to, bwalu nànsha bwikàle bukolè bwa bishi, Cìtàbùùjaayi.

61 Mpindyewu bààkabanga kunungana, ki Nzambi kubàbùtulaYè. Ki pashiishe kudicipaYè, mu cijji Cyèndè cikolè amu, ne: “Kabàvwakù mwa kubwela mu Diikisha Dyèndè to.” Ne Bible mmwambè apa, ngeela meeji ne Cìdi mu nshapità mwi—mwi3, ne: “Bitàlù byabo byakapòna myandanda mu cipèèlà.”

62 Nshapità mwi3 ku mvensà wa 17.

Kàdi mbanganyi bàvwàye muumvwile bibi munda mwa bidimu makumi anaayi abu? Kabàvwa ng’aba bààkenzà mpèkaatù, beena bitàlù byakapòna mu cipèèlà abu anyi?

63 Ne ku bònsò bààkapàtukà mu Èjiipitù, anu babidi pàtupù mbààkabwelà mu buloba bulaya. Mu bantu bònsò bàà mu cikondo cya mvùlà ya Noà abu, mu matùkù a kale awu, mùvwa misùuka mwandamukùlù yàkasungidiibwà, pa mìliyaalà. “Mushikù wa mbèlu mmubùmbàkàne, ne njila mmubùlākàne, ne nekwikalè anu bakesè bààmupetà.”

64 Bàmwè bantu bàdi bàmba ne: “Dìbà adi, Mwanèètù Branham, kàdi bishi bwa binunu byònsò bìdì Bible mwambè ne nebimwenekèku abi?”

Anjì vùlukàayi anu búngì bwa bàdì bafwáfwfawe mu lukóngò ne lukóngò lwónsò alu abu, biikàle beena Kilisto, mu bikondo byónsò abi. Bónsò abu's nebàbiikè ku lufù. S'ki bàdì bènza Mubidi awu. Nwènù nudi batèkèmène ne nekwikalè miliyaalà lukàmà mu Amerike emu, bààpàtukà, anyì bàà kukwàbò, bantu bàà lelù ewu aba. S'mbifwànyine kwenzeka ne kakùpàtuku nànsha makùmi àtaanu. Kàdi Èkèleeziyà munène mupikula's mmulààle mu lupwishi, mwindile. Bòbò abu's ki bilengà byà Nzambì bidì biikishe mu lupwishi. Kàdi misùukà yàbò yìdi mwinshì mwa cyoshelu cyà Nzambì. Kabèèna mu ngiikàdilù wabò udi ukèngediibwa to. Bàdi mu mubidi kampànda, cya bushùwà, kàdi ntèòfànì. Ne bàdi bèèla lubilà kùdi Nzambì ne: "Too ne ku dībà kaayi?" Bàdi mwa kumòngana muntu ne mukwèndè, kàdi kabèèna mwa kulabulangana ku byanza to, mubidi wà mùshindù awu.

<sup>65</sup> Udi mwa kutwilangana ne mamwèbè mu Butùmbi dilòòlò edi, bu wèwè mwa kuya, kwèna mufwànyine kumulabula ku cyanza to bwalu kèna ne cyanza cyà mùshindù awu to. Kwèna mufwànyine kucyùm vwa mùdi mufwànyine kuumvwa mpindyewu emu to. Bwalu, byumvwilu bitaanu mbidì bitèèkiibwe mu ewu mubidi, bwa kuwùkòntonona. Diikalangana dyèndè ndifwànyine kuumvwika mu cipaapu cishìllàngàne.

<sup>66</sup> Mbyenzè anu mùdi mulùme ne mukàjèndè. Kamwàkwikala byà disèlangana to, anyì disèdiibwa, mu Dyulu. Bwa cinyi? Bwalu mùdi dinanga dyà mùshindù mushìllàngàne. Kamwèna byà dijinga dyà mulùme ne mukàjì to. Bintu byónsò abi mbimanè kupita. Wèwè udi mukezula ne mutòòke zee.

Kàdi kacya kanùtukù banjì kusòmbela mu awu ngiikàdilù to, ki bwa cinyi kanwàkafùkiibwa bwa awu ngiikàdilù to. Nudi anu mu dindila muntwamu. Kàdi nudi nujinga bikolè bwa kwalukila mwaba wunùvwà bafùkiibwe mulùme ne mukàjì, ne mwòmù amu Nzambì neàjuulè mubidi awu mu lupwishi lwà buloba ne neàwùtùmbishè. Dībà adi nenùmonè, nùlabulè, nùlengè, nùnunkilè ne nùteelejè, ne nenùswikakanè. Katwàkumanyakù . . .

Nsòmbelu wa Mwanjèlo kí mmufwànyinekù kutùsànkisha to. Katwàkafùkiibwa Banjèlo to. Nzambì wàkafùka Banjèlo. Kàdi Wàkatùfùka mèmè ne nwènù, bantu balùme ne bakàjì. Mu ngiikàdilù awu ki mutwikalà, bwa kashidi, ku Dilwa Dyèndè dibènesha adi.

<sup>67</sup> Mpindyewu, mònaayi mwàkàpangilàbo, bwalu bàkenza mpèkaatù ne kupangila butùmbi. Nzambì wàkabàleeja Dikunji dyà Kapyà. Wàkabàleeja bimanyinu ne maalu a kukèma. Wàkabàpàtula. Wàkabàbweja mu diteeciibwa, bwa kubàteeta ne kubèèla ku cipimu.

68 Mpindyewu, wêwè kùtukù mupetè mateeciibwa búngì cyaanáà ànì? Kùdidilàkèènyì bwa òwò awu to. Sànkà. Nzambì ùdi neebè. Yèyè ùdi ùteeta bwa kwela diitabuuja dyèbè ku cipimu. Tàngilà Yobò mu Dipungila Dikùlukulu, pàakambàYe ne: “Udi mutàngilekù musadidi Wanyì Yobò, muntu mwakàne, muntu mupwàngàne awu anyì? Kakwènakù wa bu yèyè awu pa buloba to.”

69 “Kaa,” mwàkambàye, “bushùwà, Wèwè’s ngudi umukùba: kàyi ne ntàtu, kàyi ne byà dilubakajila meeji. Kèna ne majitu a maalu a mfrangà, byònsò anu bilenga. Kènàku ne disaamà, anyì mukenyì wà disaamà to. Anji lekèlà mèmè mmupye. S’nèmmufikishè ku diKwela milawu, muKutàngìle mu mpàla.”

70 KwambaYè ne: “Nyèyè awu mu cianza cyèbè, kàdi kwàngacikù mwoyi wèndè to.”

71 Kaa! Kwenzayè byònsò pa kuumusha anu kwangata kwà mwoyi wèndè, kàdi kàyikù mwa kunyungisha Yobò to. Yobò ùvwa mumanyè ne ùvwa mwimànyìne pa Dìyi ne dipàngadika kàyi ùnyunga to. Ncyà bushùwà. Ne démons yònsò ya mu iferno kayìvwakù mwa kumunyungisha to, bwalu ùvwa mumanyè ne ùkaavwa mufile mulàmbù awu. Yèyè ùvwa mwakàne. Kàdi bôbò bàvwa bàmfùnda, bàmba ne: “Udi mwenzè mpèkaatù, Yobò, ne Nzambi ngudi ukunyooka ewu.” Yèyè ùvwa mumanyè ne Nzambi kàvwa . . . ne yèyè kàvwa mwenzè mpèkaatù kumpàlà kwà Nzambì to. Ùvwa mumanyè ne ùvwa mwakàne. Kì mbwalu ùvwa muntu mwìmpè to, kàdi mbwalu ùvwa wìtaba mulambu wà dyosha wà pa kaaba kèndè awu.

72 Nènku, dilòlò edi, tudi bamanyè ne mwoyi wèndè wàkajaadika patòoke ne yèyè ùvwa mwakàne. Ne paùdi . . . Kì nkuteeta bwa kwalukila kwènù ku Butùmbi bwalu ùdi uteeta kwambulwisha mutumba neebè to; aci’s ncìmpè. Kì mbwalu udi ukadìvwija wa mu èkèleeziyà to; aci’s ncìmpè. Kàdi udi walukila kwènù ku Butùmbi bwalu udi wìtaba bwakàne bwa Yesù Kìlistò, kacìyi bwa cintu nànsha cìmwè cyùdì wèwè mwine mwenzè to.

73 Mpindyewu, pàtùdi tutùngunuka ne kubala apa.

*Bwalu kutùdi nkùvwa èvànjeeliyò muyiishùbwe, . . . (mvensà mwi2) . . . ne kùdìbo pààbò; kàdi dīyi dyàkayīshībwa adi kadyàkabàkwàcisha to, kadiyi disambàkàne ne diitabuuja munda mwa bààkaditèèlejà abu.*

Diitabuuja kadìvwa munda mwa aba bàkatèèlejà Dìyi to.

74 Anji elàayi anu meeji, leelù ewu, mu mudimu mukeshè wà bwambi, wà didìpwekesha wùdi Mukalenge mumpèeshe ewu, s’bìvwa bìkèngela bwa kwikalakù kusùngìdìibwe mìliyò makùmi ànaayi ya beena Amerike, dilòlò edi. Nudi bamanyè cìdìbo bôbò bàmba anyì? “Mòna’s, s’ndubùkù. Yèyè’s mmubadi wa mu meeji a bantu. Byà nànkù to! Mòna’s, yèyè kí ngwa

mu èkèleeziyà wetù to.” Nwamònu anyi? Kí . . . nànsa wèwè mucitèèke pa Díyì ne mucijaadike ne n’Díyì dyà Nzambì, ne mmulayi wà Nzambì bìshi, nànsa bu maalu a mamanya mwa kujaadika ne nCilelèlà bìshi, kabààkwitabuuja anu mene to. Bible mmwambè ne kabàvwa mwa kwitabuuja to.

<sup>75</sup> Wèwè wambì ne: “Dìbà adi bìdi ne mushinga kaayi bwa kuCiyiisha?” Bìdi bikèngela bwa Nzambì ikalèku ne ntèmù, bwa kubàpiisha, mu Ditùkù adi. Díyì dyàkayiishiibwa ne dyàkajaadikiibwa kùdìbo, kàdi bôbò bààkatungunuka anu ne kuya mu dipanga dyàbò amu. Kí nkushààle cintu to anu dilumbulwisha. Nzambì kí mmufwànyine ne bululàme bwònsò—kí mmufwànyine ne bululàme bwònsò kulumbulwisha ditunga pàdìdi kadiyi dipetè luse kumpàlà kwà kupetadi dilumbulwisha to. Yèyè ùdi Nzambì. Kí mmufwànyinekù kwenza nàнку to.

<sup>76</sup> Mpindyewu citùdi twamba ncinayi?

*Bwa twètù bàdì . . . biitàbùùje tudi pèètù babwelè mu diikisha, bu mwàkambàye ne: Ànu mungàdicipi mu ciiji cyànyì cicolè amu, ní bàabwelapù mu diikisha dyànyì. nànsa mùkaavwà midimu mijikè kacya ku difùkà dya dyulu ne buloba.*

*Bwalu yèyè mmwakùle mu mwaba kampàndà bwa—bwa ditùkù dya mwandamutekète mu mùshindù ewu, . . .*

<sup>77</sup> Mpindyewu, ncyèna muswè kutàpa bantu ku mwoyi, ndwisha ntèdeleelu wabò to. Aku kí nkiipàcilà kàànyì to. Pàndì mpátuka nya mu madimi a bwambi, ntu nyiisha anu malongesha manènè a ciibidilu, a butangadiki, a nshìndameenu. Kàdi mu tabernacle emu, munkaci mwa bânà bàànyì mèmè kaaba aka, Ndi ndyùmva ne ndi ne bukenji bwa kuyiisha cìndì mèmè ngeela meeji ne n’Dilongesha ne Bulelèlà aci. Nwamònu anyi? Ngeela meeji ne aci ncìmpè.

<sup>78</sup> Mpindyewu, ntu ne binunu ne binunu bya balundà bimpè beena Nsabatù, bya bantu bàtù ba-Adventistes du Septième jour. Bàmwè bàà ku balundà bàà batàmbe kunangiibwa bándì naabò, bàmwè bàà kùdìbo mba-Adventistes du Septième jour.

Nànsa nàнку, nkwaka munène, wa citu cibìikidiibwa ne—ne *Díyì dya Cipròfetà* awu, bàtu bàbèngangana nàànyì bòòsha ne munu mwìkù. Bàvwa bàmba ne ntu mwambè díyì mu cyambilu, ngamba ne: “Mèmè ndi Nzambì. Kàbìdì ne—kàbìdì ne Bukènkè bùvwà bulondè abu bùvwà Mwanjèlo, ne mèmè ndi Nzambì. Ne ndi mulwè pa buloba bwa kwenza bintu binène, bwa kujaadikila bantu mùndì Nzambì.” Mpindyewu, aci ncyàkambà *Díyì dya Cipròfetà* bwànyì mèmè, mu Californie mwàmwa. Ne ní nganyì ní nganyì udi mwambè aci awu, nudi bamanyè’s, mmwambè cintu kampàndà, kaciyi cyòci to.

<sup>79</sup> Kàdi dyàmbedi, nciyi ndwisha èkèleeziyà wa ba-Adventistes du Septième jour anyi èkèleeziyà mukwabo kanà yònsò wa

ba-Sabatiques to, kàdi bìdi anu bwa bwalu bwa Èvànjeeliyò. Netùkafikè, mu tusunsa tukesè emu, kùdi beena Mpenta pààbò. Èyowà. Cyà bushùwà. Kùdi ba-Baptistes, netùkafikèku bwa kuleeja ne Nzambì kèna ùsànkishiibwa kùdi òngumba nànsha òmwè to. Ncyà bushùwà. Ùdi ùsànkishiibwa anu kùdi muntu-nkààyà. Ne Kèna bwalu ne òngumba, kacya Yèyè kàtukù naadi bwalu ne Kààdyàkwikalakù naadi bwalu to, bilondèshile Dìyì Dyèndè. Kàdi Ùtu bwalu ne bantu-nkààyà mu òngumba ne òngumba dyònsò. Èyowà, bantu-nkààyà mbàdi Nzambì naabò bwalu.

<sup>80</sup> Mpindyewu tèelejàayi eci ne ntèmà yònsò, ne byòbikù ne, dîbà kanà dyònsò, lukònkò alu lwòlò lukwimànyine, nelùpetè dyandamuna. Mpindyewu, Mukalenge àtùkwàcishèku.

<sup>81</sup> Mpindyewu, ne ntèmà yònsò: “Bwalu . . .” Mvensà mwi4.

*Bwalu yèyè mmwakùle mu mwaba kampànda bwa ditùkù dyà mwandamutekète mu mùshindù ewu, . . .*

<sup>82</sup> Mpindyewu tàngilàayi. Ùdi wàkula bwa nsabatu. Mbanganyi bàdi bamanyè ne mwakù *n-s-a-b-a-t-u* mu E- . . . mmwakù wà mu cyena Ebèlù wùdi wùmwijà “d-i-i-k-i-s-h-a”? Mbanganyi bàdi bamanyè nànkù, mu Anglais? Bushùwà. *Nsabatu* kènakù wùmwika bu mwakù wà pabwàwù anyi? Ns’mmwòmò.

<sup>83</sup> *Kujidila* kacýena cyùmvwikakù bu mwakù wà pabwàwù anyi? *Kujidila* mmwakù wà mu cyena Ngelikà. *Kujidila* mbwena kwamba ne “kuvwijibwa wa cijila.” Mu cyena Ebèlù, mbwena kwamba ne “kuvwija wa cijila.” Mu cyena Ngelikà, mbwena kwamba ne “kujidila.” Anglais, mbwena kwamba ne “kuvwija mutòòke.”

<sup>84</sup> *Nsabatu* mbwena kwamba ne “ditùkù dyà diikisha.” Ki cìvwà nsabatu wa kale awu, ditùkù dyà diikisha. Paùdi umòna *diikisha*, mbwena kwamba ne “nsabatu.” Ùcìkèbè mu mifundù ya ku cibangidilu ayi, byòbì mwa kwenzeka ne wikalè ne Bible wa cyena Ngelikà, nènku ùjandulè ní mwakù awu. . . Wèwè ne Bible wa Scofield, tàngila mèyì a kumpengà kwà dibèji pa “diikisha” apu ùmonè ní kacýena cikwaluja ku *nsabatu*. *Nsabatu* mbwena kwamba ne “diikisha,” Eyo.

<sup>85</sup> Mpindyewu tàngilàayaaku.

*Ki bwà cinyi twìkalàayi ne dicìina, bwa ne nkwepi, mulayi mutùshùla twètù bwà kubwela mu nsabatu wendè, diikisha, . . .*

<sup>86</sup> Mpindyewu, bantu bààbùngì bàtu bàneemekela matùkù, bu mùdi kuneemekela kwà ditùkù dyà nsabatu dya mu *Dùsambòmbò*. Bakwàbò bàdi bàvwija *Dyàlumingu* bu lupìngù, ditùkù dyà kukuukwila. Kàdi ku ngàsà wa Nzambì, ne ku Dìyì dyà Nzambì, Nzambì ànkwaècishèku dilòòlò edi, ndi mwa kunùjaadikila ne bònsò bàbìdi bàdi mu ntùpàkànyì. Ne

mukuukwidi wa Dyàlumingu ne muneemekedi wa nsabatu, kakùyì mpatà to bônso bàbìdì bàdì mu ntupàkànyì bilondèshile Dîyì. Ne byòbì biine, Dîyì's ki dìdì dikhàngela bwa twètù kweyemena, kî ncìdì ba-Adventistes bàmba, anyì cìdì Mishòònyì wàmba, anyì cìdì Katòlikè wàmba to. Ncìdì Bible wàmba.

<sup>87</sup> Mpindyewu, mpindyewu tàngilàayi.

*Bwalu yéyè mmwakùle mu mwaba kampànda pa ditùkù dyà mwandamutekète mu mùshindù ewu, . . .*

Mpindyewu netwikalè mwa kwimanyika cintu kampànda bu eci, ne kubiikila eci—eci ne: “Diikisha dyà Nzambi,” ditùkù dyà mwandamutekète.

<sup>88</sup> Mpindyewu tàngilàayi. “Nènku Nzambi. . .” Tèèlejàayi ewu Mufundu mpindyewu.

*. . . Nzambi wàkiikisha mu ditùkù dyà mwandamutekète ku mudimu wèndè wònsò.*

Nzambi wàkangata Nsabatu, ne ditùkù dyà mwandatekète adi divwa bule bwa bidimu cinunu, cifwànyikijilu cya Bukalenge bwa bidimu cinunu.

*Bwalu yéyè mmwakùle . . . bwa ditùkù dyà mwandamutekète mu mùshindù ewu ne, Nènku Nzambi wàkiikisha . . . ku mudimu wèndè—wèndè wònsò.*

Mupinganyi-muleeji muntu awu: “Midimu Yèndè yònsò.” Yéyè wàkiikisha mu ditùkù dyà mwandamutekète. Awu n’Nzambi.

*Ne mu kiine kaaba aka (mwinshì mwa mikenji): Ní bààbwelapù mu diikisha dyànyì.*

<sup>89</sup> Nzambi wàkiikisha, mu mubidi emu, bwalu Wàkenza maulu ne buloba munda mwa matùkù àsambòmbò, ne mu ditùkù dyà mwandamutekète Wàkiikisha ku mudimu Wèndè wònsò. Wàkiikisha bidimu cinunu. Bwalu Bible mmwambè, ne: “Ditùkù òmwè pa buloba dìdì bidimu cinunu mu Dyulu; bidimu cinunu mu Dyulu bìdì ditùkù òmwè pa buloba.” Mbanganyì bàdì bamanyè ne Mifundù mmyambè nànkù mu Peetèlò Mwibìdì? Eyo. “Nzambi wàkiikisha mu ditùkù dyà mwandamutekète. Ne Wàkaakula mùshindù ewu mu mwaba kampànda.”

<sup>90</sup> Mpindyewu, tèèlejàayi ne ntèmà.

*Bwalu yéyè mmwakùle mu mwaba kampànda bwa ditùkù dyà mwandamutekète mu mùshindù ewu ne: Nènku Nzambi wàkiikisha . . . ku midimu yèndè yònsò.*

*Ne mu kiine kaaba aka kabidì, (mikenji): Ní bààbwelapù mu diikisha dyànyì.*

Wàkapèèsha beena Yudà, mu njila pàvwàbo bàfùmina ku buloba bulaya, anyì, bùumukila mu Èjiipitù batàngile ku buloba bulaya, nsabatu wa ditùkù dyà mwandamutekète awu.

<sup>91</sup> Mpindyewu tèèlejàayaaku.



*Ki bwa cinyi bu mùdìbi ne kùcìdi kushààdìle bwa bàmwè kubwelabòmu, ne kùdì aba bàakadyànjlàbo kuciyiisha. . .*

Diikisha's! Nzambi wàkabàpèèsha mikenji, ne nsabatu ùvwa ndíyì diinâyì.

*. . . kabàakabwelamù to bwa bupidyà: . . .*

<sup>92</sup> Mpindyewu tàngilààyi. Ùdì wàkula bwa mikenji, mwàkabwelàbo, kabíyì bisambakaja ne diitabuuja to. Kabàvwa bàyineemekela to. Bàvwa bàneemekela nsabatu bu civùlukilu ne, bàvwa bàya ku buloba bwa nsabatu, bwa kupeta diikisha dyà kashidi ku ntátù yàbò yònsò ne dilubakaja dyàbò dyònsò dyà meeji, kakùciyi benzejanganyi bàà midimu mikolè, kakùciyi kabidi mèbà a bufuku a kaayi diikisha awu to. Bàvwa mu njila batàngile ku buloba bulaya bwa diikisha. Bùvwa ne mabèèle ne bwíci bituuta nkòka. Tumuma twà mvinyò tùvwa tunène mu mùshindù wà ne bantu bàbidì mbàvwàku mwa kwambula cisumbù cyàtù pa makaaya. Kaa, buloba kaayi bwa diikisha dibènesha's wè! Kàdì bàkapangila kubùpeta pàkafikàbo kuntwaku, bwa bupidyà bwàbò. Bàkabàcingulula, mu ntàntà wa kilòmèètà makùmi àsambòmbò ne yinaayi cyanàànà ne Èjiipitù kwakuumukàbo, ne ku buloba bulaya abu. Ne byàkabàkèngela bidimu makùmi ànaayi bwa kumùfika, bwa bupidyà bwàbò. Nzambi wàkabàpèèsha mupròfètà wabò, kumupèèsha cimanyinu Cyèndè, kumupèèsha Dikunji dyà Kapyà, kuleejayè bimanyinu ne maalu a kukèma, ne kubàyiishayè Èvànjeeliyò. Kàdì bóbò kupàtuka, bènda bàkèbangana ne mishipa ne milungu yà màmpà, ne kupònabò mu cipèèlà. "Ne bitàlù byàbò byàkabùtuka mu cipèèlà."

<sup>93</sup> Yesù, ku mpokolo, ki mwàkambàYe.

Bàakamba ne: "Baataatù bèètù's bàakadyà manà mu cipèèlà, munda mwa bidimu makùmi ànaayi."

<sup>94</sup> Yèyè kwamba ne: "Mémè NDI Dyàmpà dyà Mwoyi didì difùmìne kùdì Nzambi mu Dyulu adi. Mémè NDI Dyàmpà dyà Mwoyi. Mòsà kààkanùpèèshakù adi Dyàmpà to. Taatù Wanyì ngudi ufila adi Dyàmpà. Ne Mémè NDI Dyàmpà didì difùmìne kùdì Nzambi mu Dyulu adi. Muntu yèyè mudyè Dyòdì edi, kàadyàkufwàku to." Ki dishiilangana ndyòdì adi.

<sup>95</sup> Mpindyewu tàngilààyi. Kwambabò ne Yèyè. . . "Bààkanwà ku Lubwebwe lùvwà mu cipèèlà, munda mwa bidimu bùngì kampànda."

<sup>96</sup> Yèyè ne: "Mémè NDI lwólò Lubwebwe alu." Dìnà Dyèndè dya Cijila dibeneshiibwè's wè! "Mémè NDI lwólò Lubwebwe alu."

Mmunyì mùvwàYe mwa kwikala lwólò Lubwebwe alu? Lubwebwe alu lùvwà Lubwebwe lwà nyumà. Lùvwa lwènda lùlonda bàna bàà Izàlèèlà. Ne Mòsà ùvwa ne dikombo mu cyanza, divwà mulangala wà cilumbulwidi cyà Nzambi

awu. Ki Nzambi kumwambilaYè bwa kutuuta Lubwebwe alu, ne yèyè kutuuta Lubwebwe. Nènku pàakatuutaye, mâyi àkapàtuka mu Lubwebwe alu. Ne Kilistò nguvwa Lubwebwe alu, ne cilumbulwidi cyà cibawu cyà Nzambi bwa mpèkaatù cyàkadikùma pambidi Pèndè. “Nzambi wàkeela bubì bwètù twètù bònsò pambidi Pèndè,” ne bubì abu bwàkataayisha mwoyi Wèndè. Ne mu mwoyi Wèndè mwàkafùma Nyumà Mwîmpè ùpòngoloka, byenzè bu misùlù yà mâyi, bwa cisàmbà cìvwa cìbùtuka, cìpùnga ne lufù.

“Mèmè NDI Lubwebwe lùvwà mu cipèèlà alu.”

“Mòna’s,” mwàkambà awu, “Udi muswè kwamba ne . . .”

<sup>97</sup> Yèyè ne: “Mòsà, yèyè mwine wàkanwàmbila aci awu, s’wàkajinga wàmba kufwà bwà kumòna ditùkù Dyànyì. Kàdi wàkadimòna mu citùpà.”

<sup>98</sup> Awu ne: “Mpindyewu, Udi uswa kutwàmbila mŪdi munene kutàmba Mòsà? Ne mŪdi mumòne Mòsà? Wa bwalu Mòsà mumanè kufwà kùkaadi bidimu nkàmà mwandamukùlù mijimà.” Awu ne: “Bwa mpindyewu kaayi twàmanyi ne Wèwè udi ne démon,” mu ngaakwìlù mukwàbù ne, mupàle. “Twàmanyi ne Wèwè udi mupàle.”

<sup>99</sup> KwambaYè ne: “Kumpàlà kwà Abraham kwikalayèku, NDI. Mèmè nguvwa NDI MUNÈNE uvwa mu kaacipuka kàà kàlàkuka kapyà aku awu’s. Mèmè’s ki Kapyà kàvwà mu kaacipuka kàà kàlàkuka kapyà aku aku. Mèmè’s ki Mwanjèlo uvwa wenda kumpàlà kwàbò awu.” Ki kwambaYè ne: “Ndi mufùme ku Nzambi, ne Ndi ngaalukila ku Nzambi.” Ne Yèyè ùvwa mufùme ku Nzambi, muvwijiibwe mubidi ne musòmbèle munkaci mwètù; mwalukile ku Dikunji dyà Kapyà òimwèòimwè adi.

Kàdi’s ki Yèyè ewu, dilòlò edi, paanyimà pàà bidimu binunu bibidì, “umwèumwè awu makèèlèlè, leelù, too ne kashidi,” wènza cintu cìmwècìmwè aci, ùlombola bânà Bèndè babènesha abu.

<sup>100</sup> Ne bààbúngì bàdi bàbwela . . . bwa bupidyà. Mpindyewu mmwambè ne: “Yèyè mmukòse ditùkù,” ditùkù òivwà Nzambi mujikije mudimu Wèndè adi. Pashiishe: “Yèyè mmukòse ‘dikwàbò ditùkù,’ mu mùshindù ewu ne, bòbò batèèlèje, bòbò balwè, bàdi bàneemekelà nsabatu, batùngùnùke mu ngondo mipyamipya ne bikwàbò abu.” Ki kùdi bânà bèètù ba-Adventistes bàteeta kunwàluja nkwòkù aku.

<sup>101</sup> Mpindyewu twànji tùtungunukàayi ne kubala. Mònaayi.

*Ki bwa cinyi . . . kùcidi kushààdile bwa bàmwè kubwelabòmu, ne aba bàakadyànjlàbo kuciyyiisha kabààkabwelamù to bwa bupidyà:*

<sup>102</sup> Mpindyewu, mvensà wa 7. Kaa, ekèlekèle! Ndi ngamba ne, Mifundu mmisonsola mu makùmi makolè. Ndi ngamba ne,

Mifundu, mu mîshindù yònsò, mmisonsola. Makùmì a Bible mmapwàngàne.

<sup>103</sup> Nukààvwakù bamanyè ne États-Unis ewu ùtu nnombà wa dikùmì ne isàtù mu byònsò bidìye wènzà anyi? Nudi bamanyè ne ùtu mwenjìibwe mu colonies dikùmì ne yisàtù anyi? Nutukù bamanyè ne dibèndelà òvwa ne mitootò dikùmì ne yisàtù ku cibangidilu anyi? Nutukù bamanyè ne byònsò bidì États-Unis wènzà bidì mu nombà wa dikùmì ne isàtù anyi? Nutukù bamanyè ne ùdi ùmwènèka mu Bible mu Bwàkabuulwibwà 13 anyi? S'ncyà bushùwà nànkù. Kanyama kakesè, mwànà wa mùkòòkò udi upàtuka mu màyi awu, kaciyi dyungwila ne misùmbà ya bantu . . .kèna upàtuka mu màyi to, kàdi mmu buloba, mùdì kamùyì muntu to. Ùvwa ne tusèngù tukesè tùbidì: bukòlè bwa cyena mbùlámàtadi ne bwa butèndeleeedi. Ne yéyè ùvwa mwànà wa mùkòòkò: budishikaminyi bwa ntèndeleeelu. Ne paanyimà pàà mutanci, kwendelabò cyàpàmwè ne yéyè kwakula bu dragon, ne kukwàtayè mudimu ne bukòòkeshi bwònsò bùvwà naabù Loomò kumpàlà kwèndè. Ki cyàlwilà ditungà dyètù ncyòci aci. Fùndaayi nùlamè. Tàngilàayi mùdì Nsangilu wa Maèkèleeziyà ne Kàtòlikè bidisanga pàmwè, ne tàngilàayi nùmonè cìdi cyènzekà.

<sup>104</sup> Ncyà bushùwà ne bantu bàdi bàlondà Dikunji dyà Kapyà nebàyoobè, kàdi mbadilongòlòle bwa ditentemunyiibwa mu cikondo aci, ncyà bushùwà, bamanè anu kudìlongolola bwa kuyabò. “Bwalu Mwànà wa mùkòòkò mmubàcimùne,” mùdì Bible mwambè, “ne aba bàdi baMulondè, bwalu bààkabìikidiibwa ne mbasungula ne beena lulamatu, Basungula bàà Nzambì.” Ndi mbènga kuya ku cipròfetà aci bwa mpindyewu, bwa twamònakù mwa kutùngunuka ne eci nùnkù.

<sup>105</sup> Tèelejàayi ne ntèmà, nshapìtà wa 7, ku . . .Ndi muswè kwamba ne nshapìtà mwì4, ku mvensà wa 7. Mwandamutekète nnombà wa dyoya nendè. Ìsàtù nnombà wa Mwoyi. Mwandamutekète nnombà wa dyoya nendè, ne eci cìdi cìfìla nsabatu mukùmbànàngàne.

“Ne cyàkàbidì,” vùlukàayi, mmwambe ne: “Nzambì,” mu mushindù ewu. Pashìishe yéyè kwakula bwa “mikenji,” mu mushindù ewu. Ne pashìishe, kàbidì: “Yéyè mmukòse ditùkù,” ditùkù diisàtù, musangu mwisàtù.

*Kàbidì, yéyè mmukòse ditùkù, ditùkù kampànda, wàmbyila mu Davidi ne: Leelù ewu, paanyimà pàà ntàntà buleyi nùnkù; . . .Leelù ewu, paanyimà pàà ntàntà buleyi nùnkù; mùdìbi byambìibwe ne: Leelù ewu nwènù batèèlèje dìyì dyèndè, kanùpapishi myoyi yènù nànsha. (Tàngilàayi.)*

*. . .bu ne Yesù ùvwa mubàpèeshe diikisha (nsabatu), . . .nùnkù yéyè kì mmwakùle bwa dikwàbò ditùkù paanyimà to.*

Bipungu bidi bishintuluka ne Yesù Kilistò: kuumuka ku mikenji kuya ku ngàsà, kuumuka ku byenzi kuya ku ngàsà, kuumuka ku cintu kampànda cyùdi wêwê wenza kuya ku cintu kampànda cidì Nzambi mwenzè, mwimànyine pa dikumbanyina dyèbè wêwê mwine anyi pa dikumbanyina Dyèndè Yèyè. Byàkashintuluka.

<sup>106</sup> Pààkapàtukà Mòsà mu cipèèlà, mwikàle ne mikenji, wákamba ne: “Kwèndi masandi. Kwibi. Kùshebeyanganyi. Újidilè ditùkù dyà nsabatu.” Pààkapàtukà Yesù mu cipèèlà. . . Pààkalwà Mòsà, dyàbùlù wàkamuteeta. Dyabùlù mmwenzè anu ùmuteeta, yèyè wàkatùmakù ntèmà. Mòsà ùvwa ne kaaba kàà butekète. Mbanganyi bàdi bamanyè ne civwa ncinyi? Cijji. Nènku mmwenzè anu ùbàmòna bàkuukwila kànà kàà ngombe kàà ngòlò, kwimanshayè panshi mèyi awu ne kuàcibulayè, ùnùleeja ne bwakwidi abu bùvwa mwa kucibudiibwa. Kàdi Nzambi kumupèeshawù cyàkàbidi.

<sup>107</sup> Kàdi pààkapàtukà Yesù mu cipèèlà, matùkù makùmi ànaayi a kujila kwà byàkudyà, Úvwa ne nzala, kaaba kàà butekète kàmwèpelè kàvwaYe naakù. Ki dyabùlù kulwayè kùdiYe e kwambayè ne: “Wèwè ní Udi Mwànà wa Nzambi, andàmùnà mabwe aa tũng àlwe mampà. Enzàbi cishimà kaaba aka. Ngànji mmònèbi Ucyenza, apu kaayi nènKwitàbùjè.”

<sup>108</sup> Yesù kwambaYè ne: “Bààkafùnda ne: ‘Muntu kààkwikala ne mwoyi bwa dyàmpà nkààyaadi to, kàdi ku Dìyi dyònsò didi dipàtukà mukana mwa Nzambi.’” Kumanyayè ne wàkatwilanganaye nendè mwaba awu kàvwa m’Mòsà to, bwalu Yèyè wàkayiila ku Dìyi.

<sup>109</sup> KuMubàndishayè ku lusongo lwà ntempèlù, kwambayè ne: “Wèwè ní Udi Mwànà wa Nzambi, Dyèlèbi panshi.” Ki *kulaabayè* nsùkaadi pambidi, kàyi mutèele to, kàdi mulaabè Mufundu nsùkaadi pambidi. Yèyè ne: “Bààkafùnda ne: ‘Yèyè neàtuminè Banjèlo dìyi, pa bwalu abu, bwa dibà nànsha dimwè Wèwè kwikadi Wálwa kutuuta dikàsà ku dibwe. Yèyè neàKwambùlè.’”

<sup>110</sup> Kàdi Yesù kuyaYè buludi ku Dìyi, ne kumutàndishaYè.

<sup>111</sup> KuMubàndishayè pa mukùnà ne kuMuleejayè États-Unis ne Allemagne ne Suisse, ne matunga ónsò a pa buloba, àvwàku mafwànyine kwikalakù awu, kwambayè ne: “Ónsò aa ngàanyi mèmè. Ndi ngenza naawù cyònsò cìndi muswè.” Kabyèna bikèmesha to mùtùdi ne mvità ne ndululu’s. Yèyè ne: “Ndi ngenza naawù. . .” Kabyèna bikèmesha to mùdi bakàji bàvwàla. . . ne kabàyi bànyookiibwa to, kùdi mikenji. Ónsò mmakòokèsha kùdi dyabùlù. Ki cidì Bible mwambè. Sàtaanà kwambayè ne: “Ngàanyi mèmè. Ndi ngenza naawù cyònsò cìndi muswè.” Yèyè ne: “Wèwè munkuukwile, nènKuvwijè mfùmù mündi mèmè emu.”

112 Yesù kwambaYè ne: “Bààkafùnda ne: ‘Neùkuukwilè Mukalenge Nzambi webè nkàâyendè, ki uwàkwàcilà mudimu.’ Nguumùkìlè apa, Sàtaanà.”

Bwa cinyi? Yesù ùvwa mumanyè ne Yèyè nguvwa mwa kulwa mupyànyi wawù mu Bukalenge bunènè bwa bidimu cinunu ebu, pàvwà Bukalenge Bwèndè mwa kulwa. “Diswa Dyèbè dyènzekè pa buloba mùdìdi dyènzeka mu Dyulu.” Kakwàkwikala kàbìdì divwàlà dyà tùpùtulù to. Kakwàkwikala kàbìdì dinwà dyà maalà to. Kakwàkwikala kàbìdì dyalakana to. Kakwàkwikala kàbìdì masandi to. Kakwàkwikala kàbìdì lufù to. Kakwàkwikala kàbìdì tunyinganyinga to. Yèyè ùdi ùlwa mupyànyi wa ditungà ne ditunga dyònsò. Ng’Èndè Yèyè. Ncyà bushùwà. Ng’Èndè Yèyè, ne Yèyè ngwàlwa mupyànyi. Kàdi Sàtaanà ùdi naawù mbwà cipòlò kampàndà cyà cikondo, mbwena kwamba ne leelù, utùdì ne mwoyi ewu.

113 “Kàdi Yèyè mmukòse ditùkù, wàmba ne: ‘Leelù ewu, paanyimà pàà ntàntà buleyi nùnkù.’ Ne mmwambè ne: ‘Kùpapishi mwoyi wèbè to.’”

*Bwalu bu ne Yesù ùvwa mubàpèeshe diikisha, . . .  
nùnkù yèyè kì mmwakùle bwa dikwàbò ditùkù  
paanyimà to.*

114 Wèwè mwanèètù Adventiste, tàngilà Aci. Pòlò kaaba aka, ngudi mwambè ewu. Ne Pòlò mmwambè, mu Ngalàtiyà 1.8, panwikalà nufùnda mifùndu ayi, Ngalàtiyà 1.8 ne: “Mwanjèlo wa mu Dyulu yèyè mulwè kuyiisha mukwàbò èvànjeeliyò nànsha wa bìshi pa kuumusha Ewu ùndì mèmè muyiishè, mulawu wùmulandàle.” Pòlò mmwambè ne: “Bu ne Yesù ùvwa mubàpèeshe ditùkù dyà Diikisha . . .”

115 Tàngilàayi, pàakatùùlukàYe ku mukùnà aku. KutùùlukaYè dìbà adi. Ùkaavwa mucimùne dyabùlù. Ùvwa mwediibwe maanyi, mudìlongòlòle bwa mudimu Wèndè wà bwambi. KwambaYè ne: “Nukàadi bumvwè bàmba, kùdì beena kale abu ne: ‘Kùshebeyanganyi,’ kàdi Mèmè ndi nnwàmbila ne ewu yònsò ukàfikidi mwanààbò munda, kapàyi bwalu to, wàmanyi kushebeyangana. Nukàadi bumvwè bàmba, kùdì beena kale abu,” leelù ewu, baneemekedi bàà nsabatu. “Nukàadi bumvwè bàmba, beena kale, mu mikenji amu ne: ‘Kwèndi masandi.’” Bìvwa bìkèngela anu kwenza cyenzedi, bwa kwikala mupiile. “Kàdi Mèmè ndi nnwàmbila ne, ewu yònsò ukàtàngidi muntu mukàji bwa kumwalakana awu wàmanyi kwenda nendè masandi munda mwa mwoyi wèndè.” Bishiilàngàne’s! Mushiyè buludì dîyi diinâyì adi ku luseke’s. Kàdi Wàkabàpèesha Diikisha anyi?

116 Tùmonààyibì cìdiye mwambè. “Davidì wàkamba ne: ‘Paanyimà pàà ntàntà buleyi nùnkù, kùvwa mwa kulwa Diikisha dipwàngàne.’” Nzambi wàkiikisha ku midimu Yèndè, mu ditùkù dya mwandamutekète. Nzambi wàkabènesha ditùkù

dyà nsabatu, ne wàkadipèèsha beena Yudà mu cipèèlà, mu mushindu ewu. Kabàkabwela...bwa bupidyà, bwalu Diyì kadìvwa disambakaja ne diitabuuja to. “Kàbìdì, Yèyè mmukòse ditùkù kampànda, wàmbila mu Davìdì ne: ‘Paanyimà pàà ntàntà buleyi nùnkù.’”

Nkàmà ya bidimi paanyimà pàà Davìdì mumanè kufwà, Mwànà wa Davìdì ùvwa mwa kjuuka, udi Yesù awu ne: “Nènku bóbò buumvwa Dìyì Dyànyì, kanùpapishi mwoyi wènù to.” Nzambi neàkulè ne mwoyi.

117 Mpindyewu tàngilàayi, bwa mvensà wa 9 mpindyewu, nwènù bàdì bàbalà abu. “Bu ne Yesù ùvwa mubàpèèshe diikisha,” mvensà wa 8, “nùnkù Yèyè...kì mmwakùle bwa dikwàbò ditùkù to.”

118 Bu ne kùvwa ne cyà kwikala nsabatu, bu ne kùvwa ne cyà kwikala dineemekela dyà dyàlumingu, Yèyè nùnkù’s mmudyàmbè. Bu ne Yèyè ùvwa mwambè ne: “Mpindyewu kakùcyèna kàbìdì nsabatu to, kakùcyèna kàbìdì dineemekela dyà ditùkù dyà mwandamutekète to, cìNdì muswè bwa nwènù kuneemekela ndyàlumingu,” nùnkù’s mMucyàmbè. Pòlò mmwambè ne Yèyè ngwàkamba. Nùnkù’s mMwambè ne: “Nwènù bònsò kuukwilaayi mu dyàlumingu. Ki ciikalà diikisha ncyòci aci.” Ee, bu Yèyè muswè bwa kuneemekelabò nsabatu, nùnkù’s mMwambè ne: “Shààlaayi ànu nuneemekela ditùkù dyà mwandamutekète. Kàdì mpindyewu Ndi muswè nuneemekelè dyàlumingu, ditùkù dyà mwandamukùlù adi.” To. Kàakacyàmbakù to.

119 Mmwambe ne: “Bu ne Yesu wàkabàpèèsha ditùkù, Kàvwakù mwa kwikala mudyàmbè anyi?”

120 Mpindyewu mvensà wa 9. Dilongòlòlaayaaku.

*Ki bwa cinyi kùcìdì kushààle diikisha bwa cisàmbà cyà Nzambi, dineemekela dyà nsabatu bwa cisàmbà cyà Nzambi.*

*Bwalu ewu udi mubwelè mu diikisha dyèndè (dyà Kilistò), wàmanyi kulekela pèndè midimu yèndè sungasunga, mwàkalekelà Nzambi yèndè, dyà nsabatu.*

121 Nwacimònu anyi? Mpindyewu twàngatàayi Mufùndù kampànda bwa kutwà cyòci eci nyama ku mikòlò. Èyo. Pààkenzà Nzambi buloba mu matùkù àsambòmbò, Wàkiikisha mu ditùkù dyà mwandamutekète, ne kààkenzakù kàbìdì mudimu to. Dìnà dyà Mukalenge dìbeneshiibwè. Yèyè wàkiibaka buloba, kutèekapù bufùki, ne kuya kiikisha; ne kààkaalukilakù kàbìdì to, bwa kwibaka cyàkàbìdì buloba. Yèyè wàkajikija midimu, ne wàkaya kiikisha. Mpindyewu, mu...Pashìishe, paanyimà pàà bidimu cinunu abi, pashìishe mpèkaatù kubwelayè; pashìishe Kilistò wàkaleejibwa, Mwànà wa mùkòòkò wàkaleejibwa. Mpindyewu, bààkapèèsha beena Yudà cyòci eci bu cifwànyikijilu cya Diikisha dya ditùkù dyà mwandamutekète.

Mpindyewu, *yéyè wàkakòsa dikwàbò ditùkù, wàmabila mu Davidi, . . . paanyimà pàà ntàntà buleyi nùnkù, kùdi kùlwa dikwàbò diikisha.*

<sup>122</sup> Mpindyewu adi Diikisha ncinyi? Buulùlaayi pàmwè naanyi mu Maatàayi, nshapità wa 11, mu citùpà cya ndekeelu cyà nhsapità wa 11 wa Maatàayi Munsantu awu. Mpàakajikijà Yesù diyiisha Dyèndè pa mukùnà, nènku nenùmonè cyàkambàYe.

<sup>123</sup> Wàkamba ne: “Ewu yònsò ukátàngidi muntu mukàji, ùmwalakana, wàmanyi kwenda nendè masandi munda mwa mwoyi wèndè. Ewu yònsò ukáfikidi mwanàabò munda, kapàyi bwalu to, wàmanyi kushebeya mwanàabò awu.” Bintu byònsò ebi, ne Yéyè kààkalengakù dìyì diinâyì adi to, nsabatu awu.

<sup>124</sup> Mpindyewu nyewu Ùkaadi wòya. Ne Nsabatu m’Mulayi munènè wà Nzambì. N’Diikisha. Mpindyewu, mpindyewu tàngilàayi kaaba aka, pàakamanàYe kwoya ne masànkà awu. Ki Yéyè udi wàmba ewu, mvensà wa 27 wa nshapità wa 11 wa Maatàayi Munsantu. Mwaba awu, Ùvwa ùlongesha masànkà mu nshapità mwi5.

*Bintu byònsò mbimpèèsha mu cyanza cyànyi, kùdi Taatù wanyì, ne muntu nànsha umwe kî mmumanyè Mwànà to, pa kuumusha Taatù, . . .*

Nwamònu’s, kwèna mwa kumanya umwe kùyi umanya mukwàbò to, bwalu Yéyè ùvwa Taatù mumwènèshìibwe mu mubidi.

*. . . anyì muntu kî mmumanyè Taatù to, pa kuumusha Mwànà, . . .*

<sup>125</sup> S’bidi ànu bu ne bantu mbafwànyine kumòna Aci ne kubènga kukòkangana. Cyà bushùwà’s. Nzambì kàtu Bantu bàsàtù to. Yéyè mwikàle Nzambì yisàtù, dībà adi twètù’s tudi bampàngaanù. Udi Nzambi ki wepi? Badi, bònsò bàsàtù, Nzambi umwèpelè, mmidimu yisàtù ya Nzambi umwèumwè awu. Yéyè ùvwa Taatù, mu mmwènekeli wa Nyumà Mwímpè, mu Dikunji dyà Kapyà adi mu cipèlèlè. Yéyè ùvwa Mwànà, pàakakwàtàYe mudimu ne mudimu wà Buumwànà apu. “Mu mutanci mukesè emu bàà pa buloba kabèèna bàmmòna kabìdi to; Nénye. Nèngàalukilè cyàkàbìdi ne nèngùikalè neenù, munda mwènù mene, too ne ku ndekeelu kwà buloba.” Nwamònu anyi? Yéyè ùdi Buutaatù, Buumwànà, ne Nyumà Mwímpè kabìdi. Cìdi cyònsò ànu Nzambì umwèumwè mene awu udi ukwàcila mudimu mu midimu yisàtù mishìilàngàne: Buutaatù, Buumwànà, Nyumà Mwímpè. Kacya . . .

Yone wa Kumpàla 5.7 mmwambè ne: “Kùdi bàsàtù bàdi bàfila bujaadiki mu Dyulu: Taatù, Mwànà, Nyumà Mwímpè. Bàsàtù aba bàdi Umwe.”

<sup>126</sup> Toomààsè wàkaMwambila ne: “Mukalenge, tùleejè Taatù.” Aci necimusànkishè.

127 Yèyè kwamba ne: “Ndi neenù ntàntà buleyi nùnkù, kàdi wèwè kùyi uMmanya?” Yèyè ne: “Paùdi muMmòne Mémè, udi mumòne Taatù. Kàdi bwa cinyi kwamba ne: “Tùleejè Taatù?””

128 Mpindyewu, Bùmwè mbucyàngàte, kasùmbù kàà beena bùmwè aku’s, ne bàteeta kwenza Taatù, Mwànà, ne Nyumà Mwímpè, ànu mudimu wùmwèpelè ne mwaba wùmwèpelè, mùdi munu wèbè awu, wùmwèpelè. Aci ncyà mafi. Nzambi kàvwakù mufwànyine. . . Yesù kàvwakù mufwànyine kwikala taatù Wendè Yèyè mwine to. Byòbì ne Ùvwa nànkù, dîbà adi Yèyè’s ùvwa. . . Ee, mmunyì mùvwàYe mufwànyine kwikala taatù Wendè Yèyè mwine?

129 Ne pùikalàbi ne Nzambi Yèyè mmuntu, mutàpùlùke ne Nyumà Mwímpè, apu’s Ùvwa ne baataatù bàbìdì. Bwalu Bible mmwambè ne: “Nyumà Mwímpè ngwàkabwikila Màriyà mundidimbì nènku kwimitayè.” Kàdi Bible mmwambè, mu Maatàayì 1.18, ne, “cintu cìdì ciimicìbwe munda mwèndè aci ncyà kùdì Nyumà Mwímpè.” Udi tatw’Èndè mwab’awu ki nganyì, Nyumà Mwímpè anyi Nzambi? Bònsò bàbìdì, Nyumà umwèumwè awu, pàtupù Yèyè’s ùvwa wa ku dileidiibwa dya mu masandi ku nyumà yìbìdì.

Adi ndiyi diswika dyà Kàtòlikè, ne kacitukù dilongesha dya Bible to. Martin Luther ngwàkapàtuka naaci, ne cyena Kàtòlikè búngì cyanààna cìdì mu èkèleeziyà wa ba-Luthériens aci. Wesley kulondayè naaci. Ne cìcìdì anu citungùnùke, kàdi’s ndipanga. Kí m’Bulelèlè to. Kacya kacitukù, kacya kacitukù cyanjì kwikala Dilongesha dyà Bible to. Kacya kacitukù cyanjì kwikala dîyi ditùma dyà mu Bible to, bwa kulongesha Nzambi yìsàtù.

Kùdì Nzambi umwèpelè. Yesù wàkamba ne: “Tèèlejà, Éyi Izalèlèlè, Mémè ndi Mukalenge Nzambi webè, Nzambi umwèpelè,” kacyi Nzambi yìsàtù to.

130 Mu Àfrikè, bàtu bàbàtiiza musangu wùmwè bwa Taatù, musangu wùmwè bwa Mwànà, ne musangu wùmwè bwa Nyumà Mwímpè. Ki dîbà adi mwena Yudà wa mukwàte ne byà luse awu ùlwilapù, wàmba ne: “Wa kùdìbo aku udi Nzambi wenù ki wepì? Ngwepì, n’Taatù, m’Mwànà, anyi n’Nyumà Mwímpè?” Bàdì, bònsò bàsàtù, Umwe. Bible mmwambè ne bàdì Umwe.

131 Yesù ùvwa nzùbu uvwa Nzambi musòmbèlemù. Bible mmwambè ne—ne, Timòtè wa Kumpàla 3.16: “Kakùyi *dikòkangana*,” (mbwena kwamba ne, “mpatà”) “bwalu busokoka bwa difwànà dyà Nzambi mbunène. Bwalu Nzambi wàkamwèneshiibwa mu mubidi, mumòna kùdì Banjèlo, mwangàcìbwe mu. . . muyiishìbwe, mwitàbùùjìibwe, ne mwangàcìbwe muulu mu Butùmbì.” Ùvwa n’Nzambi awu. Bible mmwambè ne: “Dìnà Dyèndè nedibiikidiibwè ne *Èmanùwèlè*, udi ku dyumvwija ne: ‘Nzambi neetù.’” Bible mmwambè ne: “Yesù, munda Mwèndè mùvwa musòmbèle kaabujimà kàà Bunzambi mu mùshindù wà mubidi.”



<sup>132</sup> Mutùvwà bacilongè dilòòlò adi ne: Nzambi, ku cibangidilu, ùvwà Nyumà. Ki pashiishe, mu Nzambi, kupàtukamù Logos, anyi tèòfàní, uvwa mmwènekèlu wa muntu, wákabìikidiibwa ne Mwànà wa Nzambi, mudyànjila kufwànyikija. Wàkalwa pa buloba, mu mubidi wà musunya, kumpàlà mene kwà kulwaYè mu Yesù Kilistò. Mpindyewu minààku aci tǔng, mwanèètù. Mémè's nènkujaadikilèci.

<sup>133</sup> Pàà—pààkaMumònà Mòsà. Wàkamba ne: “Mmonèku mmwènekèlu Webè, Mukalenge.” Ki Nzambi kumusokokaYè mu lubwebwe. Nènku pààkopicilàYè mwab'awu, yèyè kwamba ne: “Cìvwa nnyimà wa muntu.” Cìvwa n'Tèòfàní awu. Ncyà bushùwà menemene.

Pashiishe, byàkakèngela bwa Tèòfàní awu àvwijiibwè musunya. Kàyi mu kwàbò Muntu to, kàdi byàkakèngela bwa Muntu umwèumwè awu àvwijiibwè musunya, bwa kutuulaYè kalonda kàà lufù.

Mùtù lubùlùbùlù pàdilu lùsùmangana, lùdi lùshiya kalonda aku. Kàdi yèyè kààkashiyakù aku... Ùvwà mwa kubweja kalonda mu mubidi wà buntu bwalu mmpèkaatù. Kàdi, mwanèètù, pààkasùmàye mubidi wà Èmanùwèlè awu apu, wàkajìmija kalonda kèndè aku. Èyowà's, mukalenge. Yèyè ùdi mwa kuvuma kàdi kàcyenà kàbìdi ne kalonda to.

<sup>134</sup> Kabyèna bikèmeshà to, Pòlò, pààkayàbo bwa kumukòsa mutù, wàkamba ne: “Wèwè lufù, kalonda kèèbè kàdi penyì? Udi mwa kuvuma ne kunungeena mu matàma mwònsò muwàswà amu. Lukità, bucìmunyi bwèbè bùdi penyì? Kàdi twasàkidila kùdi Nzambi udi utùpèèshila bucìmunyi kùdi Yesù Kilistò.” S'ki bwalu abu's.

Byàkakèngela bwa Nzambi Yèyè mwine ènzè cyòci aci. Wàkalwa ne wàkamwèneshiibwa mu mubidi. Wàkaalukila mu Nyumà.

<sup>135</sup> Wèwè udi wamba ne: “Mwanèètù Branham, too ne mpindyewu, kwèna mwanjì kutwàmbila ne, ndìbà kaayi dyàkavwijiibwà Nzambi mubidi kumpàlà kwà kulwaYè mu Kilistò to.”

Pàvwà Abraham musòmbe mu ntentà wendè, dǐngà ditùkù, kwàkalwa Banjèlo bàbìdi ne Nzambi, balwè tamàkàtamàkà too ne kùdiye, mu mubidi wà buntu, Bàvwa ne lupwishi ku bilàmbà Byàbò ne bàvwa bacyòke, ne Bààkasòmbela panshì. Ki Abraham kupàtukayè e kuumushayè kànà kàà ngombe kùdi mamwákù, ne kukàshebeyayè. Ne kwenzayè ndambù wa mabùlù a minyìinyi a kànà kàà mùkòòkò. Kuyayè kangata... kwambilayè Sarah bwa kwangatayè bukula bwa nsèke ne kubùsenga, bwa kwenza tütò twà twoshila pa lukàsu. Ne kwangatayè màntekà a ngombe, ne kwangatayè mabèèle a ku màntekà awu. Ki kupàtukayè naabi mwaba awu ne kubitèekayè, ne Nzambi kubidyaYè.

136 Aleluuyah! Ki bwa cinyi: “Diitabuuya dyànyì nditàngija Kùdi, Wèwè Mwànà wa mùkòòkò wà Kàlvaryò.”

137 Nudi nwela meeji ne aci ncintu cyà cicolèle Nzambì anyi? Nzambì, Yèyè utu mwenzè binshidimba byònsò ne kàlisiyumù, ne byònsò bidi pa buloba ebi awu, Wàkatùùluka bwa kumwènekela Abraham. KwambaYè ne: “Udi wela meeji ne Nènkusokòkèci anyi, pèèbè mwikàle mupyànyì wa buloba?” Amen. “Ncyàkukusokokaci to.” Nzambì kwangataYè ànu. . .

138 Twètù tudi benza ne bintu dikùmi ne bisambòmbò. KwangataYè ànu ndambù wa binshidimba, ne ndambù wa kàlisiyumù, ndambù wa mpiitùloolù, bukènkè bwa mu cibwàshibwàshi, kwenza ne “Hyu!” “Bwelà mu awu, Ngabùdyèlè,” mubidi’s!

139 “Hyu!” “Bwelà mu awu, Abisèntà.” Awu kubwelamù.

Banjèlo bàbidi, bàà mu Dyulu!

140 Nzambì kwolola cyanza e kwangata dyanza dyàbi: “Hyu,” kumùbwelaYè, Yèyè mwine. Mutùùlùke pa buloba, ne mwikàle ne nzala. Àbeneshiibwè. . . Bishi bwa aci, nwènu bàna bèètù ba-Adventistes bàtù kabàyi baswè kudyà minyìnyì abu? Netùbwelèmu, paanyimà pàà katanci. Nzambì wa Bukolè bwònsò, Yehowah awu, jandùlaayaaku tũng Dìnà dimwèdimwè adi ní kî ndikùdimùnyìibwe ne n’Dyòdi dimwèdimwè dya ku kaacipuka kàà kàlàkuka kapyà adi aku! Aleluuyah!

Ne pààkiimanàYe pa buloba apa, Wàkamba ne: “Kumpàlà kwà Abraham kwikalayèku, NDI, Yèyè umwèumwè wa ku kaacipuka kàà kàlàkuka kapyà aku awu’s.” Ncyà bushùwà, Elohim, mònaayi ní kî ngumwèumwè awu. Úvwa Umwèumwè uvwa ku kaacipuka kàà kàlàkuka kapyà aku awu.

141 Úvwa Umwèumwè uvwa apa mu bwikadi bwa Abraham, mu mubidi wà musunya, wàkadyà kànà kàà ngombe, ne kunwà mabèlè a ngombe, ne kudyà màntekà malaaba pa tûtò twoshila pa lukàsu awu. Dìnà dyà Cijila dyà Nzambì dibeneshiibwè! Wàkatùùluka buludi kuntwaku ne kwambaYè ne: “Ncyàkushiya. . .”

Nènkù Yèyè úvwa mwelè nyimà. Yèyè ne: “Abraham, Nènkumwènekèlè, ne neùlèlè mwànà awu. Nyawù ukàadi ne bidimu lukàmà mpindyewu, Sarah ne makùmì citèemà.” Ki Sarah, munda mwa ntentà, kwenzayè ne: “Ha!” musekè’s. Yèyè ne: “Cyàsekèshì Sarah ncinyi?” Paanyimà Pèndè’s; ntentà pankaci pààbò.

142 Abraham kwambayè ne: “Sarah, udi musekè anyi?”

143 “Bwàlà bwànyì, nànsha kakese.”

144 Yèyè ne: “Èyowà’s, s’wàsekì.” Ndubùkù lwà mùshindù kaayi alu? Ndibala dyà mu meeji dyà mùshindù kaayi adi?

Yéyè's ùdi wènza cimwècimwè aci leelù. Yéyè ùdi Yehowah-yilè, Yehowah-laafà, umwèumwè awu makèèlèlè, leelù, too ne kashidi. Kacya Yéyè kàtukù ùpangila to.

<sup>145</sup> Anjì Mutàngilaayi. S'ki Yéyè udi mwimàne awu. KuyaYè buludi ne kwakulaYè ne Abraham; ne kujìminaYè, ku mèsù kwèndè. Ki nkambwà Abraham awu kwambayè ne “wàkaakula ne Nzambi mpàla ne mpàla, Elohim,” Nzambi umwèumwè awu. Nwacyùmùvù anyi? Kí m'Bantu bàsàtù to, mwanèètù. Mmidimu yìsàtù ya Mupersona umwèpelè!

<sup>146</sup> Ku cibangidilu ùvwa umwèumwè awu, Ùvwa Nyuma munène, Mpokolo awu, mùvwà mùsanganyiibwà bulelèlè bwònsò, dinanga dyònsò, ditalala dyònsò amu. Cyònsò cìvwà cikezùke cìvwa mu Mpokolo ewu. Cyàkabanga kuvùnga mubidi, teòfànì, mùshindù wà mubidi kutùyaaya aku. Kí mmubidi mutùmbishìibwe to, kàdi mubidi wà banjèlo, mwenzè bu nàнку; mwikàle ne mbùngakeenu, ne mmwènekèlu kampànda.

<sup>147</sup> Dìbà dyònsò dìndì mmòna mucì, ndi ndyàmìbidila ne: “Mucì wàwà's nciibùlòjì. Kùdi wà cyà bushùwà mwaba kampànda.” Mucì awu mmwenza ne cintu kampànda. Meeji kampànda ngàdì mawènzè. Ne cyònsò cidì buloba ebu bwènza nkuleeja Dyulu mu cimfwànyì. Ki mùdi Bible mwambè. Nènku piikalàku mucì pànwapa wùdi ne cyà kubùtuka, kùdi mu Butùmbi wikalà kawùyi mwa kubùtuka nànsha.

<sup>148</sup> Mémè mmòna muntu, mmòna babàka batekète balenga, mulùme ne mukàjèndè, bènda bàpwèka ne mùsèèsù, bananga bènda pàmwè, cidì cileeja cinyi? Dìna dyà Mukalenge dìbeneshiibwè! Kùdi mu Butùmbi biikalà kabàyi mwa kubùtuka nànsha. “Ntèntà wa pa buloba ewu yéyè munyangùke, tudi ne mukwàbo ùkaadi mwindile,” tèòfànì.

<sup>149</sup> Dìbà adi nudi nuumvwa bùsàtù's: Nyumà munène awu, musòmbèle mu Mwànà, Yesù; Yesù musòmbèle mu Èkèleeziyà. “Mu ditùkù adi, nenùmanyè ne Mémè ndi munda mwa Taatù, Taatù munda Mwànyì, ne Mémè munda mwènù.” [Katùpà kàà mukàbà wà mèyi munda mutupù—Muf.] Cyònsò cìvwà Nzambi aci, Yéyè wàkacipòngolwela munda mwa Yesù; cyònsò cìvwà Yesù aci, Wàkacipòngolwela munda mwa Èkèleeziyà. Ki bwalu abu's. “Mémè munda mwa Taatù, Taatù munda Mwànyì; Mémè munda mwènù, ne nwènù munda Mwànyì.” Ki—ki Mubidi ngwòwù awu.

<sup>150</sup> Ki lutàtù lùdi naalù èkèleeziyà ndwòlù alu. Mbalongèshiibwe kaadilongesha kàà kale kàà lukutukutu, kàà buucilùmaacikàjì, kàà maamù mununu wa mùshindù kampànda, mùyaayàbo mu lunyaanya ne bàkadyà bidyà bya nsupù ne bènzamù manàyi a twartà. Kabyèna bikèmesha to mutùdì ne bimvundù bùngì butùdì naabù abu. Kabyèna bitùkèngela ndongamu ya bânà ne bidyà bya nsupù nànsha. Cidì citùkèngelà ng'Èvànjeeliyò wa kale mukàyàbàle, ne balùme

bàa diitabuuja biikàle ne mwelè wà mvità mukùdika kwàka, ne bèèlangana tudyòmbò. Cìdì citùkèngelà leelù, kí ndilongesha kampàndà dyà tèòlòjì wa lukutukutu ne dilongesha dikwàtakaja kùdì bantu dyà kaadingumba kampànda to. Cìdì citùkèngelà ng'Èvànjeeliyò mukàyàbàle muiishila mu Bukènkè ne Bukolè bwa dileeja patòokè dyà Nyumà Mwímpè.

151 Mònaayi mpindyewu apa.

Mwàkambàye ne, yéyè mmukòse dikwàbò *ditùkù*, wàmbila mu *Davidi*, . . .

. . . *bu ne Yesù ùvwa mubàpèeshe diikisha*, . . . *nùnkù yéyè*. . . *kì mmwakùle bwa dikwàbò ditùkù to*.

Kàdì kùcìdì kushààle . . . *diikisha bwa cisàmbà cyà Nzambi*,

*Bwalu ewu udi mubwelè mu diikisha dyèndè*, . . . *wàmanyì kulekela midimu yèndè sungansunga*, *mwàkalekelà Nzambi yèndè*.

152 Mpindyewu mpenyì patwikalà mwa kubala? Maataàyi, makùmi àbìdì ne . . . Nshapità wa 11, mvensà wa 27.

*Bintu byònsò bìdì Taatù mumpèeshe, mbimpèesha kùdì Taatù wanyì, èyowà's wè: ne muntu nànsa umwe kì mmumanyè Mwànà to, pa kuumusha Taatù; (Èyo.) anyì muntu kì mmumanyè Taatù to, pa kuumusha Mwànà, ne ewu yònsò udi Mwànà muswè kumubuulwila auu.*

153 Nwamònu's, kí mbilondèshìle mùdì muiilè, mùdì mwè—mwèpiskòpò muswè bwa wèwè kumanya to. Mmùdì Nzambi muswè bwa wèwè kumanya. Pawikalà kùyi mwa kumòna Dibuuulula edi to, kùkonku mwèpiskòpò to. Konkà Nzambi. Kùkonku mpaasàtà webè to. Konkà Nzambi. “Mwànà ngudi uMubuulula,” *Yéyè*, mupinganyi muleeji-muntu.

154 Tèèlejàayi. Eci necinùpapùlè. Díyi ditùma ndyòdì edi. Pòlò mmwambè ne: “Bu ne Yéyè ùvwakù mushìye dikwàbò ditùkù, nùnkù's mMudyàmbè.” Kàdì cyàkambàYe ncyòcì eci.

*Lwàyi kùndì, nwènù bònsò bàdì bàkwàta mudimu mukolè ne bambùle majitu makolè, ne mèmè nènùpèeshè nsabatu, diikisha.*

*Angàtaayi cikòkedi cyànyì pa wèwè, ne yiilàayi kùndì, bwalu mèmè ndi mupòle ne wa mmwènekèlu mupwèkèle mu mwoyi, ne nwènù nenùpetè nsabatu mu musùkà wènù.*

*Bwalu cikòkedi cyànyì ncipeepèle, ne majitu àànyì àdi mapeepèle.*

155 Tàngilàayi cìdì Pòlò mwambè.

. . . *bu ne Yesù ùvwa mubàpèeshe diikisha*, . . . *nùnkù yéyè mmwakùle bwa dikwàbò ditùkù.*

Kàdi *yéyè* mmukòse *di...ditùkù*, wàmabila mu *Davidi*,...*paanyimà pàà ntántà buleyi nùnkù*;... panùdi *nutèèleja dîyi dyèndè*, *kanùpapishi mwoyi wènù to*.

“Nènku kùcidi kushààdìle...” Tèèlejàayi mpindyewu, mvensà wa 9.

*Ki bwa cinyi kùcidi kushààdìle diikisha*, nsabatu, *bwa cisàmbà cyà Nzambi*.

*Bwalu ewu*, mulùme anyi mukàjì, *udi mubwelè mu diikisha dyèndè...*

“Lwâyi Kùndi, nwènù bônso bàdi bàkwàta mudimu mukolè ne bambùle majitu makolè, Mèmè nènnùpèèshè diikisha.”

... wàmanyi *kulekela midimu...yèndè*, *mwàkalekelà Nzambi yèndè*.

<sup>156</sup> Udi mufwànyine kwikala ne bidimu makùmi àbìdì. Udi mufwànyine kwikala ne bidimu makùmi àsàtù. Udi mufwànyine kwikala ne bidimu makùmi àtaanu. Kàdi mu kasunsa kaùdi ànu umvwa Dîyi dyà mukana dyà Nzambi dikookola ku mwoyi wèbè, kuwùpapishiku to. Dìbà adi bwelà... “Ewu udi utèèleja Mèyi Àanyi, wítabuujá Yèyè udi muNtùme, ùdi ne Mwoyi wà kashidi, wà Cyèndèlèlèlè, ne kàadyàkupitakù ku dipiila to kàdi mmumùke ku lufù muyè ku Mwoyi.”

<sup>157</sup> “Ambà tǔng, Mwanèètù Branham, cidi cyènzekà ncinyi?” Udi upeta Nyumà Mwîmpè. Kilistò ùdi ùbwela munda mwèbè. Ncyà bushùwà anyi?

<sup>158</sup> Buulùlaayi pàmwè naanyi mu Yeshàayi, ku nshapità wa 28, nènku túbalaayi. Yeshàayi, ku nshapità wa 28, tùmònèbi cidi mupròfetá mwambè pa bwalu abu. Maatàayi... 28, túbangilàayi ku mvensà wa 8. Lutàtù lukole lwà ku matùkù a ndekeelu ndwòlò elu. Bidi bikèngela bwa tǔjikijè mu katanci kakesè emu.

*Bwalu mèèsà ónsò neikalè, àdi mûle tètè ne bilùshì ne...kakwènakù mwaba mukezùke to.*

<sup>159</sup> Ngǎnjì ngìmanè katanci kakesè. Mùvwà Ernie mwambè dilòlò adi, ùvwà ùyiikilangana ne muntu kampànda. Ernie Fandler, mwanèetu wa balùme wa ku Suisse ewu, kwambayè ne: “Ngímànyì bwa cyǎnjì cìbwelèku.”

<sup>160</sup> Ndi muswè bwa eci cìbwelè.

... *kakwènakù mwaba mukezùke to.*

*Bwalu mèèsà ónsò neikalè mûle tètè ne bilùshì...*

Nènku ànu mùdi *mbwa* ùya ku *bilùshì* byèndè *ne ngulube...ku bitocì byèndè* amu, ki mùdi kàbìdì bantu bàkùdimukà.

<sup>161</sup> Mbwalu kaayi ebu neenù's nwènù ba-Méthodistes? Kale wàwa nwènù's nuwva ne Bukènkè. Ncinyi cyènzèki? Nzambi kunùnyèngabù mu cyanza, Yèyè kuBùpèèsha ba-Nazaréens.

Cyānwěnzèkèdì ncinyì nwēnù ba-Nazaréens? Musangu kampànda nwēnù's nuvwa ne Bukènkè. Nzambì kunùnyèngaBù mu byanza ne kuBùpèèshaYè beena Mpenta. Menemene's. Nwēnù beena Église de Dieu ne bakwàbò beena cijila, bwalu nwabèngi Bukènkè, nwadivwiji màngumba ne nwambì ne: "Katwèna baswè kwitabuuja bya bipite pa *eci* to." Nzambì wàpàtuku buludì ne wānùleeji ne Yèyè ùvwa ne bantu bàvwàku mwa kuMulonda's.

<sup>162</sup> Cyānwěnzèkèdì ncinyì nwēnù beena Mpenta? S'nuvwa ne Bukènkè. Nzambì's wānùnyèngiBù.

Dikunji dyà Kapyà didi dyènda dìtentemuka. Dìbà dyònsò òvwa Dikunji dyà Kapyà dìtentemuka, Èkèleeziyà ùvwa ùtentemuka pāmwe naaDì.

Nènku Luther pàakavwijàye bulongolodi, pambèlù pàà èkèleeziyà wa Kàtòlikè, èkèleeziyà wendè sungasunga, Dikunji dyà Kapyà dyàkatentemuka ne Wesley wàkaya naaDì.

Wesley kudìvwijayè bulongolodi ne kwenzayè dyèndè òngumba, ki Dikunji dyà Kapyà kutentemukaDì ne ba-Nazaréens kuyabò naaDì.

Ba-Nazaréens kudìvwijabò bulongolodi, ne église de Dieu kuyayè naaDì; ne kwambabò mùvwàbo kabàyi òngumba to, kàdi pààbò's ki cìvwàbo.

<sup>163</sup> Pahiishe cyàkenzekà ncinyì? Cintu cyàkenzekà cyàkalondà, beena Mpenta kumò nabò Kapyà aku, kàdi ki bóbò bàyaaya bàba. Kàdi cinwàkenzà ncinyì? S'nwàkenza dilongesha pa myakulu, ne kucìvwija bulongolodi ne: "Bìvwa bìkèngela bwa bantu bònsò kwakulabò mu myakulu kumpàlà kwà kupetabò Nyumà Mwimpè," dìbà adi Nzambì wàkapàtuka e kuya ne wàkanùshiya basòmbe mwaba wunùdì ewu.

<sup>164</sup> Cidì cinwěnzèkèle ncinyì nwēnù beena Bùmwe aba? Nwēnù kupeta dibàtiiza, Dìna dyà Yesù. Nwēnù kwenzelapù dilongesha, ne kutàpuluka ne bakwàbò bààCì, ki Nzambì kutentemukaYè kuya e kunùshiya basòmbe mwaba awu. Cyà bushùwà.

<sup>165</sup> Cidì cinwěnzèkèle ncinyì nwēnù beena Assemblée de Dieu, Nsangilu wa Bònsò wa kale ewu? Nudi benzèle bulongolodi pa bwēnù abu, ki Nzambì kutentemuka kuya e kunùshiya basòmbe. Ne mpindyewu nukàadi ànu musùmbà wà mukwàte mashikà, wà bintu byà kwìsukwìsù mùdì bakwàbò bònsò abu emu.

Kàdi Dikunji dyà Kapyà didi dìtentemuka. Aleluuyah!

*. . . mèèsà ònsò mmùle tèntè ne bilùshì . . .*

<sup>166</sup> Tàngilàayi Mèèsà a Mukalenge. Mòna's, bàdi mene. . . Mvwa mu mwaba kampànda wùdìbo bàngata mulungu wà kale wà dyàmpà. Kàdi pààbì's dyàmpà adi didi ne cya kwenjiibwa ne dyàmpà dyà kadiyi dyela lwevènyà. Ne bóbò bàdi bàdifila kùdì bangènzàmpèkàatù, banù bàà mfwankà, bandumbà, bakàji bàà masandi, bu mùdìbi ne bàdi ne mènà mu mukànda.

167 Ne nwênù ba-Baptistes nudi mene nubiikila aci ne mmèèsà a Mukalenge “a kaayi a bantu bônso.” Mpindyewu, nwênù ba-Baptistes elàayikù mpungi, Nzambi neànunyèngè mwine mpungi awu. Ncyà bushùwà menemene, kanwàkupeta mwa kumwela to. Mmèèsà a Mukalenge “a kaayi a bantu bônso,” nuditàpulula, umwèka bu wa cijila kutamba mùdi amu.

Vùlukàayi ne, ewu n'tabernacle wa ba-Baptistes. Ki cinùdi nupeta, nudi nuvwija wênù awu bulongolodi. “Kaa,” mùdi wamba, “twètù katwèna bulongolodi to.” Èyowà's, s'ncinùdi. Ncyà bushùwà, ncinùdi. Nudi nwamba ne: “Twètù tudi bwobùmwè.” Èyowà, bwa ewu yônso udi ubwela mu ciibi amu ne ùlongesha ànu menemene mùshindù wunùdi nwênù nuciitabuwa awu, apu kaayi mbimpè. Kàdi, mukwàbò, ka—kanwàkumwipata to, kàdi's nenùmuumùshè mu buuwetù bwènù amu. S'ncyà bushùwà menemene. Kaa, s'nudi ne mùshindù wà dicyènza. Nànsha Nzambi pèndè's ùdi ne mùshindù wà dicyènza. Kàdi Èkèleeziyà wa Nzambi neàtentemukè. Dikunji dyà Kapyà kadyàkutwàla byà nànkù awu to.

*. . . mèèsà ònsò mmùle tèntè ne bilùshì . . .*

168 Mpindyewu tèèlejàayi. Mpindyewu eci necinùpapùlèkù ànu bwa katancì kakesè. Tèèlejàayi. Némبالè Dîyi. Ewu ùwva nganyì? Mupròfetà, Yeshàayi.

*. . . mèèsà ònsò mmùle tèntè ne bilùshì . . . mu mùshindù wà ne kakwèna cintu nànsha cìmwè cikezùke to, ànu mbwa ùdya mbwa nendè.*

169 Nulwa mu èkèleeziyà nùnkù: bakàji bàkòsa, bàbebulà nsukì yàbò, bavwàle tùpùtulù, bàpàtuka bàmòna balùme bàlwa bènda bàpweka ne mùsèèsù; bàkòsa mashinde mu bulà, bàna bakesè bàà bakàji bàjinga kuumvwakù muntu wèla kashibà kàà mbwa mulùme anyì kàà mbwà wa diitu aku, cyònsò cidiku aci, nudi bamanyè's ne: “Wet-hyu!” Kaa, nudi nwela meeji ne nudi balenga kumona's, kî mmwòmò?

170 Ne nwênù balùme nwenda nupweka ne mùsèèsù, ne cifwankà ku mishiku, mwine awu mulami mu kasumbù kàà balami. Wèwè's udi umwèka ànu bu ngombe wa ku Texas mutùula nsèngù's. Ki pashìshe wèwè kudyàmbidila mùdi kampànda. S'ncyà bushùwà menemene. Kabyèna bikèmesha to mùdi mèèsà ònsò . . . Uya ukangata mèèsà a Mukalenge, ne wenza pèèbè bu udi kampànda, eku wibila ne wiba ne ushima, mu lumingù lujimà amu. Mbwalu kaayi ebu neenù's?

*. . . mèèsà ònsò mmùle tèntè ne bilùshì . . .*

171 “Kaa, mèmè's ntu ngangata Mèèsà a Mukalenge. Cyà bushùwà, s'tutu tucyènza mu èkèleeziyà mwètù. Yesù wàkamba ne neÀtùbiishè ku lufù ku matùkù a ndekeelu twètù twangata Mèèsà a Mukalenge.”

172 Kàdi: “Ewu udi udyà ne ùnwa kàyi mukùmbànyine, ùdi ùdya ne ùnwa dipiilà dyendè yéyè mwine, kàyi ùjingulula Mubidi wa Mukalenge to. Bwa bwalu ebu bààbùngì bàdi bàsaama ne batekète munkaci mwènù, ne bààbùngì mbafwè,” èkèleeziyà ya kale, mifwè, ya mmwènekeli wa kwisùkwisù ayi’s. Nyumà wa Nzambi ùkaadi mupàtùke munkaci mwènù. Dikunji dyà Kapyà kadicyènamù kàbìdi to. Nudi nubènga dyondopa dyà kùdi Nzambi. Nudi nubènga dibìikà dyà ku lufù.

173 “Kaa,” mùdi wamba, “kaa, Yéyè’s mmubiike ku bafwè, bilondèshile maalu-malonda.” Ee, kàdi bìshi bwa ne Yéyè ùdi umwèmwè awu leelù, piikalàbi ne mMubiike ku bafwè? Nudi nwamba ne: “Kaa, kabyèna nànkù to.” Mpindyewu, s’ki bwalu abu. Nudi ne dibìikà dyà ku lufù mu mùshindù wunùdi nwènù badìswè awu, kàdi Nzambi ùdi naadi mu mùshindù wùdiYe Yéyè mudiswe.

174 Kàdi, bwalu bùdiku bùdi ne, Bible mmwambè, citùdi twètù bamanyè ne m’Bulelèlà ne, Yéyè nguvwa mwa kushindika Dìyi. “Ne bintu bìNdì ngenza ebi nenùbyènzè bìmwèbìmwè abi. Ne Nèngiikalè neenù misangu yònsò, too ne ku ndekeelu kwà buloba.” “Yesù Kilistò umwèmwè awu makèlèlèlà, leelù, too ne kashidi.” Ki cidì Dìyi dyambè.

175 Mpindyewu nsabatu ncinyi?

*...mèèsà ònsò mmùle tètè ne bilùshì...kakùyì  
mwaba nànsha wùmwè mukezùke to.*

Nganyi wàlongeshayè dimanya?

Kì ndimanya dyà pa buloba to; dimanya dya nyumà!

Nganyi wàlongeshayè dimanya?...nganyi  
wàfikishayè...ku dyumvwa dilongesha?

176 “Kaa, Nzambi àbeneshiibwè, bwètù bulongolodi kabwèna bwitabuuja Eci to. Kì mbafwànyineku kuCùitaba to.” ... cidì bulongolodi bwènù bwitabuuja nànsha ciikàle cinyi. Ncinyi cidì Dìyi dyà Nzambi dyàmba pa cyòci aci? “Kaa, ee, bèètù bampaasàtà, udi mumanyè’s, s’mbalongè tùlaasà.” Kaa, bushùwà’s. Cyà bushùwà, mbapetè dilonga dyà tùlaasà dyàbùngì be, mu mùshindù wà bashiye ne Nzambi pambèlù pàadi. Bulelèlà, bwalu’s udi mwa kubàmbila Dìyi kàdi bòbò banyunguluka bu bàdi ku mwìshì bàmba ne: “Ee, mèmè ncyèna nDùitabuuja mùshindù awu to.” Kaa, wèwè cintu civwijìbwe cilùmaacikàjì naanyi’s we! Indilà nkwambilè.

177 Tàngilà kùneeku.

*...nganyi wàfikishayè...ku dimanya dilongesha?  
ng’aba bàdìbo balekèèshe dibèèle, ne...ng’aba bàdìbo  
balekèèshe mabèèle, ne babùmùshe ku mabèèle.*

178 Ditùkù adi, mwena mutumba naanyi kulwayè. Kwambayè ne: “Billy, mpaasàtà kampànda mu cimenga emu, muntu mukèsè mutàmbe bulenga ùdi kùyikù mwanjì kumòna...” Yéyè ne:



“Mémè ne mukàjàànyì tuvwa basòmbe bavwàle maapiijàmâ, pabwípì ne mundankùlù, ki mpaasàtà mukesè awu kubwelayè lubilu ne—ne—ne kunwàye neetù káfè ne kupàtuka kuyayè kwà mwena mutumba mukwàbò, ne kulabulanganayè naabò ku cyanza. Bòbò abu bàvwa bènza kaadinàya kakesè kàà kartà, ki yèyè kusòmbe e kunàyayè naabò kartà.” Yèyè ne: “Kaa, yèyè’s ùvwa mulùmyànà mukesè mutàmbe kumanya disòmbe ne bantu ùdì kùyikù mwanjì kumòna kacya.” Yèyè ne: “Kaa, tudì bamunangè. Katwènaku bafwànyine kukòsoloka nendè to nansha bìshi.”

179 Mémè kwimana ndambù mwab’awu, kudyàmbidila ne: “Èè?”

180 Yèyè ne: “Kaa, kwènaku pèèbè wela meeji ne bìkèngela bwa èkèleeziyà ne èkèleeziyà ikalè ne muntu bu nàнку anyì?” Huh! Ncyàkapeta mwa kwandamuna ku aci to. Yèyè ne: “Mu mukwàbò mwaba mukesè kampànda,” yèyè ne, “bàvwa ne mwaba mulenga wà dikèma. Mwambi mwine ewu ne mukàjèndè, bantu balenga bàà dikèma, bààkaya katàngila bwalu bwa bânà mu mùshindù wà ne bààkenza too ne—ne cilongelu cya Bible.” Ki yèyè ne: “Kubàpetabò búngì cyanàànà, kuujabò tètè cintu aci ne bânà bya bàyiila ne panshì.” Yèyè ne: “Èkèlekèle, yèyè’s ùdì mwa kulondela bânà bakesè tuumaalu twà mìshindù yònsò.”

181 Mémè kwamba ne: “Abi’s mbilenga. Abi’s mbilenga bya kacya.”

182 Mémè kwalukila. Ncìcìvwa mfùminakù ku Canada. Mémè kudyàmbidila ne: “Bwalu mbwabù’s mémè wabò. Èkèlekèle! Bantu... Mbwalu kaayì naanyì ebu’s? Mémè ncìtu ngenza aci to.” Mémè kuya bwa kasukula kàshinyì kàànyì. Mémè kudyàmbidila ne: “Nzambi, nyewù nkààdi nshààla mukùlàkàjì, kàdi s’ki mémè ewu. Ndì mulwè mvità. Mwelè mbilà. Musèngèlèèlàngàne. Kàdi cyònsò cìndì mpeta cìdi anu cipendu cinènè cyà bàpenda Nzambi.”

183 Cintu kanà cyònsò, muntu mukwambè cintu cibì ne: “Kaa, munsantu mubùnguluki wa mu malaba wa kale,” cintu bu nàнку awu.

184 Mémè kwelanganapù meeji. Ki Dìyì kulwaDì kùndì, dyàmbe ne: “Bantu abu bàdi bìmpè bòbò bènza nanku, kàdi wèwè Ncìtu mukubiikile bwa kwenza aci to. Ntu mukubiikile bwa kwangata Mwelè wà mvità ne kwimana mwaba awu bu Yoshùwà ne kwelanganana tudyòmbò, mwanèètù. Kí mbwà kujimija dìbà ne cisùmbù cya kale anyì bulongolodi kampandà bwà èkèleeziyà to, kàdi mbwà kwela dyabùlù kadyòmbò. Imànyìnà wèwè ku mwalu wà mvità, ambà bulelèlà ne mbulelèlà, mafi ne mmafi. Yishà Dìyì ne jandùlà ne nganyì udi ne diitabuujà dya kuDìitabuujà. Dyádije wèwè ànu mwaba awu.”

185 Mémè kwenza ngenda ngambulula diboko pa kàshinyì aku, dìbà dyònsò, nkàsukula. Mémè kwamba ne: “Twasàkidila,

Mukalenge. Twasàkidila, Mukalenge.” Mémè kudyùmvwà bímpè dîbà adi. “Mbimpè, Mukalenge, néntambè kudikwàta dyòdì ànu bikole, ne ndi muswè mfwe naaDì mu cyanza.”

...nganyì ùndì mwa *kufikisha* ku dimanya *dilongesha?* (Tèèlejàayi.)

...mèèsà mmùle tètè ne bilùshi . . .

...ng'aba bàdìbo balekèèshe mabèèle, bàdìbo buumùshe ku mabèèle.

Mpindyewu tàngilàayi.

*Bwalu kanungu* bu nàнку *pa—pa kanungu, kanungu pa kanungu; . . . kalongo pa kalongo; ne kakesè apa, kakesè pàapa:*

*Bwalu ku mishikù yìdì yìkukuminà ne ne mikwàbò myakulu nkùngààkwilà ne cisàmbà eci.*

*Bòbò bàdìbo bambile ne: Ki nsabatu nyèyè ewu munwikalà nwènu mwa kufikisha bàdì bacyòke ku diikisha; . . . citaleela ncyòcì eci: kàdì kabàyi anu baswè kutèèleja nànsha.*

*Bwalu dìyì dyà MUKALENGE dyàkalwa kùdìbo* (Muntu kàmpànda wàkaDìyiisha.) *kanungu pa kanungu, . . . pa kanungu; kalongo pa kalongo, . . . pa kalongo; kakesè apa, ne kakesè pàapa; bwa bààmòna mwa kuya, ne kupònena cyànyimà, ne kucìbukabò, ne kukwàciibwabò mu butèyi, ne kwangaciibwabò.*

<sup>186</sup> Diikisha ncinyi? Diikisha dyàkalwa dîbà kaayi? Pààkaakulà bantu mu myakùlù mikwàbò ne kupetabò mishikù yìdì yìkukumina. Mishikù yìdì yìkukumina; kayìvwa ne ciwàyi yàmba to. Yìvwa yìkukumina. Aci cyàkenzeka dîbà kaayi? Mu Ditùkù dyà Mpenta, pààkalwà Nyumà Mwímpè. Ki Diikisha ndyòdì adi: Nyumà Mwímpè. Yesù wàkamba ne: “Lwàyi kùNdì, nwènu bònsò bàdì bacyòke ne bambùle majitu makolè, ne Mémè nènnùpèèshè Diikisha. Nènnùpèèshè Mwoyi, Mwoyi wà Cyandèlèlè,” *Zoe*, Mwoyi sungasunga wà Nzambi. Nzambi neàbwelè munda mwèbè ne neàlwe citùpà cyèbè wèwè. NeÀkupèèshè dilediibwa ne àkuvwije mwànà wa balùme ne wa bakàji.

<sup>187</sup> Mpindyewu tàngilàayi. Adi dìvwa ndiikisha diisàtu dyàkafilàYe. Dyà kumpàla: Nzambi ngwàkadipeta, ku mudimu Wèndè. Diibìdì: Izalèlèlà ngwàkadipeta, mu mikenji. Diisàtu: Èkéleeziyà mmuDiipetè, bu citùpà cya Nzambi.

<sup>188</sup> Ìsàtu nnombà wa mwoyi. Mbanganyi bàdì bamanyè nàнку? Musangu wònsò wunùdì numòna ìsàtu, mmwoyi. Mònaayi, pààkafukà Nzambi buloba, mu ditùkù diisàtu mmwàkalwà mwoyi. Mbanganyi bàdì bamanyè nàнку? Ditùkù diisàtu. Kwàkalwa mwoyi mu ditùkù diisàtu dyà bufùki.

Bùsàtù: Taatù ùvwa kumutù kwà bantu, mu Dikunji dyà Kapyà; Mwànà ùvwa m'Muntu, Wàkaakula ne bantu ne kubàlongololaYè awu; Nyumà Mwîmpè nguvwa cidya ciisâtù, cìvwà Nyumà Mwîmpè, Nzambì mu bantu. Mwoyi's! Taatù, Mwànà. . .

Diikisha, dyà Nzambì; diikisha, dyà Izàlèèlà; ne Diikisha, dyà Èkèleeziyà, dineemekela dyà nsabatu.

<sup>189</sup> Pa nàнку, pawìkalà kacya kùyikù mwanji kupeta Nyumà Mwîmpè to, too ne mpindyewu, kùtukù mwanji kubwela mu Diikisha dyà Nzambì to. Kabyèna bikèngela bwa wèwè kwamba ne: “Kaa, ncyèna mufwànyine. Ndi muswè kunwà mfwankà. Ncyèna—ncyèna ànu mufwànyine kunwà to; mèmè ndi mwena Kilistò. Ncyà bushùwà ne ncyèna muswè kunwà maalà to, kàdi ndi mwena Kilistò. Ncyèna ànu mwa kunwà to, ncyèna muswè kunwà maalà to, kàdi pàànyi ntu ànu munangè kuànwà.”

<sup>190</sup> Wèwè walakana bakàji, wèwè wenza bintu byònsò byà bibì ebi, kacya kùtukù mwanji kudyata dikàsà mu cipungu cyà Diikisha aci to. Kùtukù mwanji kubwela mu Diikisha dyèbè adi nànsha.

<sup>191</sup> Kàdi paùdi ubwela mu Diikisha edi, udi ulekela midimu yèbè sungasunga ya pa buloba ayi, mwàkalekelà Nzambì Yèndè amu. Bwa cinyi? Wèwè udi citùpà cyà Nzambì. Udi wikisha, Cyendèlèèlè. Ki bwalu abù. Ki Nsabatu nyèyè awu. “Lwàyi kùNdi, nwènù bònsò bàdi bàkwàta mudimu mukolè.”

Leelù ewu, *yéyè mmukòse ditùkù kampànda, . . . paanyimà pàà ntàntà buleyi nùнку, mu Davìdi; . . . panùdi nutèèleja díyi dyèndè, kanùpapishi myoyi yènù to.*

<sup>192</sup> Ànu dikwàbò díyi dimwè anyi àbìdi kaaba aka mpindyewu, nètùwimanyikè.

*Bwalu ewu udi mubwelè mu diikisha dyà Kilistò, . . .*

*Lwàyi kùndi, nwènù bònsò bàdi bàkwàta mudimu mukolè ne . . . bambùle majitu makolè . . .*

*. . . nudi balekèle midimu yènù sungasunga, mwàkalekelà Nzambì yèndè, mu ditùkù dyà mwandamutekète.*

Yèbè wèwè mmifwànyine kwikala mu cidimu cyà makùmi àsàtù, cyà makùmi ànaayi, cyà makùmi àtaanu, cyònsò cidìku aci. Wèwè wàlekèdi midimu yèbè, mwàkalekelà Nzambì Yèndè, Cyendèlèèlè. Kùcyèna kàbìdi muswè bintu bya pa buloba to. Maalu a pa buloba àkaadi mafwè bwèbè wèwè.

<sup>193</sup> Mpindyewu, mvensà wa 11 mindyewu, ne ntèmà yònsò.

*Ki bwa cinyi tükwatàayi mudimu mukolè bwa kubwela mu diikisha adi, (kadiyi edi nùнку, kadiyi edi nùнку to, kàdi Edi nùнку), bwa muntu nànsha umwe*

*kàlu kudishindila ku cileejilu cìmwècìmwè cya bupidyà aci to.*

194 Ncinyi aci? Dikunji dyà Kapyà didi apa. Mwanjèlo wa Mukalenge ùdi neetu. Ùdi munkaci mwa kwenza bintu ànu bìmwebìmwè byàkambàYe ne Neénzè abi. Kàdi bantu bàdi bàlendukilapù, bàmba ne: “Kaa, ee, ndi ngeela meeji ne Cidi anu cìmpè’s. Mbìmpè menemene. Kaa, ngeela meeji ne Cidi anu cìmpè.” Wadimuka’s kùlu kupòna mu butèyi bùmwebùmwe bwa bupidyà abu. Cyàngàtè wèwè ne mwoyi wèbè wònsò.

195 Tàngilàayi.

*Bwalu dîyi dyà Nzambi (kaciyi dilongesha dyà èkèleeziyà to), dîyi dyà Nzambi didi ne mwoyi, ditàmbe bukole, . . . ditwè kutàmba mwele wà mvità wà nseke yìbìdi, (tèelejàayi), dipanda too ne . . . ditàpulula musùukà, ne nyumà, . . . ne manungu ne bwongò bwa mu mifùbà, ne . . . (tèelejàayi), ne didi dijingulula meeji ne mapàngadika mene a mu mwoyi.*

Cìvwa ncinyi aci? Nyumà Mwìmpè ùdi mwa kulwa wàmba ne: “Wèwè ewu udi mwenzè cintu *kampànda*. Ne udi mwenzè *cikampànda* ne mwenzè *cikansanga*. Udi ne disaamà dya mùshindù *kampànda*, ne *kansanga*. Wèwè mulongòlòle *cikampànda*, mwenzè *cikansanga*.” Nwamònu anyi? Dijinguludi dya meeji.

196 Kàdi bantu bàdi bàmba ne: “Ki cinyi aci? Mòna’s, s’ndubùkù’s. Mòna’s, s’ . . . Yèyè’s mmwena lubùkù.” Nudi bamòne cìndi muswè kwamba aci anyi? Mbantu beena lwonji, beena masandi bàà bale bàtù kabàyi bamanyè Nzambi abu.

197 “Dìdi ne mwoyi, dyedi dya meeji, ne bukole kutàmba mwele wà mvità wà nseke yìbìdi, ne dijinguludi dya meeji ne mapàngadika a mu mwoyi.”

Mpindyewu, ncinyi aci cidi cìmanya mapàngadika a mu mwoyi? Nzambi. Wèwè wambi ne: “Ee, Bible’s mmwambè ne: “Dìyi dyà Nzambi.” Dìyi dyà Nzambi’s ki Nzambi.

*Ku cibangidilu kwàkadi Dîyi, . . . Dîyi dyàkadi ne Nzambi, ne Dîyi dyàkadi Nzambi.*

*Ne Dîyi dyàkavwijibwa mubidi, ne dyàkasombela munkaci mwètù, . . .*

198 Nzambi ngutu ujingulula meeji. Abraham ùvwa mwele nyimà, ne—ne Nzambi ùvwa Pèndè mwele nyimà ku ntentà. Ki Sarah kusekayè. Ki Nzambi kukùdimuka, kwamba ne: “Cyàfikishi Sarah ku diseka ncinyi?” Mujinguludi wa meeji a mu mwoyi! Ndi muswè bwa aci cibwelèku ndambù.

199 Pashiishe pàdi mudimu wà bwambi wà mùshindù awu wùjuukà, wùvwà Nzambi mulayè mu ditùkù dyà ndekeelu awu, ncinyi cidi cyezèke? “Lubùkù.”

200 Kabààkabiikilakù Mukalenge, Yèyè mwine ne, “Beelèzèbùlà” anyi? KwambaYè ne: “Piikalàbi ne mbabiikile Mfùmù wa nzùbu ne m’Beelèzèbùlà,’ ambààyaaku tǔng mwàbèngàbo kutàmba kubiikila bayiidi Bèndè nànkù?”

201 Mémè ndi munùangè. Bìdi bileeja ne nudikù bacìjìngè, kabyèna bikèngela bwa citanda eci kwikalaci ne bifidi byà citaleela bwa nwènù kushiisha kulwa bwa kutèeleja Èvànjeeliyò to. Nudi ne nzala búngì bukùmbàne bwa kulwa mu mwaba bu nùnkù. Nzambi kàvwakù muswè kutùlekela twibaka cìngà cintu pa kuumusha eci. Tudi bacinangè mùshindù wùdici ewu. Ànu kabutabuta kakesè kàà kale aka, kàdi mùshindù awu ngutùdi bacinangìle. Nzambi kàtu ùsòmbela mu dibàlakana to. Nzambi ùtu ùsòmbela mu didipwekesha. Tudi bacinangè mùshindù wùdici ewu. Tudi ne disànkà dyà kulwa, ne mmunùdi, nwènù pèènù, bwa kusòmba mu—mu mwaba bu nùnkù. Nànsha kwòkù luuyà lukolè lwà bìshi, nànsha wèwè mukòpàkàne mu kàzakù kèèbè kapyakàpyà aku, anyi mu nkanzu webè mupyamùpyà awu bìshi, kacýèna ne cidìci cishintulula to.

Cyùdi utèeleja m’Mwoyi wà Cyendèlèlè, Dìyì dyà Nzambi didi dimanyè meeji a mwoyi wèbè. Dikunji dyà Kapyà divwà dilembèlèle kumutù kwà bânà bàà Izàlèlèlè adì, ndilembèlèle kaaba aka dilòòlò edì. Ndi mufwànyine kucýèla kadyòmbò: kakwènakù muntu udi mufwànyìne kwimana mwìnshì mwa bukolè bwa Nyumà Mwímpè Nzambi kàyi ùmwela ànu patòòke ne ùmwambila civwàye to. Ncyà bushùwà. Ki bwalu mbwabù.

202 Cìdi cinyì? Cìdi cinyì? S’n’Nyumà umwèumwè wàkalombola Bânà bàà Izàlèlèlè ku diikisha dyàbò awu, kàdi kudìshindabò bwa bupidyà. Kùdìshindikù to. Ewu mmpungà wa ndekeelu. Taatù, Mwanà, ne Nyumà Mwímpè, Mwoyi wùdi wùwìlamù.

203 Dibingishiibwa, Martin Luther, ànu mmwènekelu kampànda wà ntèdeleelu. Dijidiibwa... Martin Luther; John Wesley; dibàtiiza dyà Nyumà Mwímpè, Mwoyi. Dibingishiibwa, nkwiitabuuja; dijidiibwa, nkukezudiibwa; Nyumà Mwímpè, nkuujiibwa, Mwoyi. Kì mmu cikondo cyà Luther to; bàvwa naaCì mu mmwènekelu kampànda. Kì mmu cikondo cyà Wesley to; bàvwa naaCì mu mmwènekelu kampànda. Kàdi eci ki cikondo cidì Nyumà Mwímpè ùlwa, Yèyè mwine.

204 Nènku pawikalà kùyi muMupetè to, mmunyi mùdi, mùdikù mwa kwitabuuja bishimà? Abi bìdi bikèngela Nzambi, munda mwèbè, bwa kwitabuuja. Udi wenza maalu bu Nzambi. Udi umanya bu Nzambi. Udi wela meeji bu Nzambi. Bible mmwambè ne nudi “nzambi” yà tukesè, yà twànàtwànà. Kì mwàkambà Yesù. Bwalu, wèwè udi citùpà cyà Nzambi.

Ànu mùdibi ne mémè ndi Branham wa mukèsè, ne wèwè udi nì-nganyì-apa wa mukèsè, ne bwalu baledi bèèbè bàdi ànu ne dìnà adì. Ngiikàdilù ùdi nendè awu mbwalu baledi bèèbè bàdi mùshindù awu, bwalu udi mulediibwe kùdìbo.

Ne kabingilà kàdi kènza ne nwitabuujè Nzambi, ne nwitabuujè bishimà, ne bimanyinu ne maalu a kukèma, mbwalu nudi bàna bàà balùme ne bàà bakàji bàà Nzambi. Udi upeta Mwoyi. Mwoyi wùdi wùlwa mu mwaba mwisàtù. Eyo.

<sup>205</sup> Pààkabàndà Yesù pa mukùnà, kwònsò kùvwàYe ùya, Ùvwa wàngata Peetèlò, Yakòbò, ne Yone, bantèmù bàsàtù. Ìsàtù nnombà wa Mwoyi. Nwacyümvù anyi? Dinanga, disànka, ditalala.

<sup>206</sup> Mpindyewu, tùyaayi lùkàsàlùkàsà mpindyewu ku ndekeelu kwà nshapità aku, lùkàsàlùkàsà, patùdi tubala apu.

*Bwalu dîyi dyà Nzambi dîdi ne mwoyi, ne bukolè . . . kutàmba mwelè wà mvità wà nseke yìbìdì, . . . ne dijingulula too ne mapàngadika mene a mu mwoyi.*

*Kakwènakù cifúkùbwà nànsha cimwè cìdì kaciyi cimwènèshìibwe ku mèsù kwèndè nànsha, kàdi bintu byònsò bìdì . . . butakà ku mèsù kwà utùdi nendè ne bwalu.*

<sup>207</sup> Mwanèètù, kakwènakù lujiiji lùdi lufwànyine kwikila pa dikunji pààpa, Yèyè kàyi mulùmanyè to. “Bintu byònsò bìdì patòòke.” Mwanèètù, Yèyè mmumanyè cintu cyònsò cyùkaadiku mwenzè, meeji ònsò aùkaadiku mwelè awu. Ki cìdìYe ncyòci aci. Tudi tuMwitabuujà mùshindù awu.

Nènku pàdi Nzambi ùbwela munda mwètù, ne ùtùshikika mu Èkèleeziyà, Udi ùtèèka mapà ne bikwàbò mu Èkèleeziyà, bwa kukwàta mudimu ne Buumùntù Bwèndè. Pìikalàbi ne Nzambi ùdi Nzambi wa kàyi mikàlu awu, dìbà adi's Ùdi wòndopa babèèdi. Ùdi mwa kubiisha bafwè. Ùdi mwa kukezula beena nsudi, kutàbeeja bampofo. Ùdi mwa kufila bikèèna-kumòna. Ùdi mwa kwenza bintu byà mishindù yònsò ebi, ùkwàcila mudimu ku Èkèleeziyà Wèndè, bwalu n'Nzambi munda mwènù. Ki Èkèleeziyà nyawù.

<sup>208</sup> Mmunyi mùdi èkèleeziyà ùlwa Èkèleeziyà, nku diya kashààla wa Mwòmù anyi? To, mukalenge. Nku dilabulangana dyà ku cyanza anyi? To, mukalenge. Nkuu dibàtiiza dyà mu maayi anyi? To, mukalenge. Ku buumambàlà anyi? To, mukalenge. Nudi nuMupeta bìshi? “Bwalu ku Nyumà umwe nkutùdi bònsò babàtìiibwe mu Mubidi wùmwè.” Ki bwalu mbwabù.

<sup>209</sup> Loomò 8.1.

*Ki bwa cinyi kakücyèna kàbìdì mpindyewu dipùila . . .*

“Kakücyi dipùila dyà kùdì bàà pa buloba to.” Kabèèna mwa kukupìisha ku kantu nànsha kàmwè to.

*Kakücyèna . . . dipùilà nànshà dikesè bwa aba bàdì mu Kilistò Yesù, bàdì kabàyi bènda bilondèshìle mubidi to, kàdi bilondèshìle Nyumà.*

210 Ki bwalu mbwabù's. Ki mùdi mwa kulumbulwisha bwena Kilstò bwèbè nànkù. Ki mùdi mwa kumanya ní ukàadi mubwelè mu Diikisha adi, maalu a pa buloba kaàcyèna àkutàcisha kàbìdì to. Cyà bushùwà. Udi uàmòna, uèpuka. Udi ne cintu citàmbe bwimpè cyà kwelela meeji. Ki bwalu mbwabù: “Kakücyèna dipiilà to.” Ki mutùdi tubwela mu Mubidi nànkù.

211 Nènku udi mukùbùbwe: “Kashidi.” Mmùdi Bible mwambè. Tàngilàayi mu Ebèlù, mu nshapità wa 10 emu. Mmwambè ne:

Bwalu mwaba wùdi milàmbù ya bimpàngà bya ngombe ne mulambù wà mashi, *civùlukilu* civwa *cyenjùbwe bwa mpèkaatù ku cidimu cyònsò*.

*Kàdi ewu muntu yéyè, . . . ku mulàmbù wà mashi wùmwepelè . . .*

Dìna Dyèndè dya cijila dìbeneshiibwè's wè!

*Bwalu ku mulàmbù wà mashi wùmwepelè yéyè mmupwàngàje bwa kashidi . . .*

212 Aleluuyah! Kaciyi bwa ditàbuluja dìdì dilondà to, kàdi *bwa kashidi*. “Bintu byà kale byàmányi kujìmina; ne bintu byònsò mbilwè bipyabìpyà.” Tudi twendela mu Bukènkè, Bukènkè bulenga abu. Nyuunyì yidi yimba bishiilàngàne.

213 Musòmbe kaaba aka, mutàngile kanwàyi wa maalà a kapyà mukese ewu, kùkaadi bidimu bitaanu, ngeela meeji. Rosella, munù wa mèsù mapilula, wènda ùpweka ne mìsèèsù ya mu Chicago, mukwàcike, wènda ùtetuka, ùkadyèla mu mpèkaatù wa mùshindù wònsò uvwakù awu, mukwàcike ne cyònsò civwàye mufwànyine kwikala aci. Ki dilòlò kampànda, Nyumà Mwìmpè, udi ne mwoyi ne bukòlè kutàmba mwelè wà mvità wà nseke yibidì awu, kwambaYè ne: “Wèwè mukàji ewu, udi kanwàyi wa maalà a kapyà.” Aleluuyah! Awu Yéyè kàyi Nzambi umwèumwè uvwa kuntu kwàka awu, wàkamanya ne Sarah wàkaseka paanyimà Pèndè awu to, nànkù ncyèna mumanyè cidiYe to.

214 Mu batèeleji amu kùdi mukwàbo mukàji mukesè uvwayè muyè kangata, ne mulwè nendè muntwamu, kwambaYè ne: “Wèwè udi mukwàciki wa maadrogues.” Mùshindù mwìnè wùdiYe ùjingulula meeji a mu mutù's wè!

215 Ne bambi banène bàà cipidì citùmbùke menemene basòmbe mwaba awu, bàkaavwà benzèze butangadiki pa buloba bujimà, ne byanza bivungila paanyimà, bavwàle mápilù, bèèla meeji ne katùvwa babàmányè, byenzè bu ne mbafwànyine kwikala basòmbe mu disangisha dyà mùshindù awu Nzambi kàyi mwa kujandula ne mbanganyi to. Basòmbe mwaba awu, ne mmwènekèlu mushilàngàne, byenzè bu ne mmuntu kampànda mukwabò. Nyumà Mwìmpè kumanyaYè ne bàvwa mbantu kampànda. Ki basòmbe mwaba awu, munda mwa myoyi yàbò, bàdyàmbidila ne Civwa ndubùkù. Kabàyi bamanyè Nzambi

to ànu mùdì Hottentot kàyì mufwànyine kumanya mwanu wà beena Èjiipitù wà mafùku cinunu ne bùmwe awu. Ncyà bushùwà. Bòbò mbaCimanyè ku màleetà, kàdi kî nku Nyumà to. “Dileetà didi dishebeya, kàdi Nyumà ùdi ùfila Mwoyi.” Ki mùdìbi. Ki mmwènenenu nyéyè awu. “Ne mwoyi, ne bukole kutamba mwelè wà mvità wà nseke yibìdì, Dijinguludi dyà meeji a mu mwoyi.”

216 Tèelejààyi. Tàngilààyi.

*Anyi kakwènakù cifùkùibwà nànsha cìmwè cìdì kaciyi cimwènèshìibwe ku mèsù kwèndè nànsha, kàdi bintu byònsò bìdì butakà ne patòòke kumpàlà kwà mèsù èndè bwèndè yéyè. . . utùdì nendè ne bwalu awu.*

*Bu mùdìbi ne tudi ne mwakwidi mutàmbe bunène. . . (Tèelejààyi mpindyewu; kùdì babèèdì.) . . . yéyè udi mupite mukabwelè mu maulu awu, Yesù Mwánà wa Nzambi, twikalààyi bakwàte bikolè ditonda dyètù.*

217 “Kukwàta bikolè,” aci kaciyèna cyùmvwija ànu kutungunuka ne kufila majaadiki to. Pawikalà kùyì uleeja nsòmbelu awu to, kwèna mucìkwàte bikolè to; udi ne nsòmbelu wa lubombo. Udi. . . Mbipìciibwe ne wèwè mwikàle pambèlu pààpa wamba ànu ne udi ngènzàmpèkààtù ne kucìpwa mwoyi. Kùjìkulu mùdì mwena Kilistò, eku ne nsòmbelu wa cyanààna to; udi wèwè dibwe dyà cilèndwishi dyà ditàmbe bunène didi bàà pa buloba kabàyikù banjì kupeta kacya to. Pawikalà ngènzàmpèkààtù, itàbà nànkù, nènku ùye, ùdìlongòlòlè kumpàlà kwà Nzambi. Pawikalà mwena Kilistò, kwàta bikolè ditonda dyèbè, shààla mwaba awu.

218 Tàngilààyaaku eci mpindyewu. Ndi muswè kubweja eci kumpàlà mene kwà twètù kuumuka.

*Bwalu katwèna ne mwakwidi munène udi kàyì mwa kulengiibwa ku dyumvwa dya mateketa ètù to; kàdi mu kantu ne kantu kònsò yéyè wàkateeciibwa bu. . . mutùdì, kàdi kàyì mpèkaatù nànshà.*

Tèelejààyi.

*Ki bwa cinyi tùlwayi ne dikima dyònsò ku nkwasà wa ngàsà, bwa twamòna mwa kupeta luse, ne kupeta ngàsà ne dikwàcisha mu cikondo cyà lukèngelu.*

Dìna dyà Nzambi dìbeneshiibwè!

219 Tèelejà, wèwè Baptiste, Presbytérien, Luthérien. Neungeelè lukonko elu ne: “Abraham wàkiitabuuja Nzambi, ne cyàkabadiibwa kùdiye bu bwakàne.” Ndi mumanyè. Ki kunùtu ànu nuya misangu yònsò aku. Ncyà bushùwà. “Ncinyi cikwàbò cìdìku muntu mwa kwenza pa kuumusha kwitabuuja Nzambi?” Aci ncyà bushùwà menemene. Ki cyònsò cìdiye mwa kwenza. Kàdi pàdì Nzambi wìtaba diitabuuja adi, s’Ùdi ùkupèèsha Nyumà Mwimpè.





kuulu *eku* to. Bikèngela wikalè munda mu njila mujimà awu, mweyèmène, mushindàmène wèwè yònsò pa lupàndù lùdi Yesù Kìlistò ùkupèèsha alu, ku diitabuuja.

225 Kùdi Nyuma wa meeji matòòke udi ufùmina kùdi Nzambi. Ki mpokolo, mpokolo wa Nzambi nyèyè awu. Ki meeji matòòke ngòwò awu. Cìdi cilondà mmuntu udi wenza “cyenzedi cìmpè” bwa mwena mutumba nendè. Cìdi cilondà mmuntu, “udi ukèngela bwa wèwè kwikala mutàbàlèèle.” Cìdi cilondà mmulùmyànà, “udi mwívi” awu. Udi ulonda mmulùmyànà, “udi mushebeyanganyi,” wiba ne cingoma. Nudi numòna mùdici cikònyangala, too ne kwìnshi amu anyi? Kàdi bintu byònsò abi bìdi byàkula bwa cilelèlà.

226 Ki cìndi mèmè ngamba. Musangu wònsò wùdi umòna muntu udi...Umòna babàka bakèse bènda bàpweka ne mùsèèsù, banangàngàne, pàmwápa mbàà bidimu makùmì mwandamukùlù. Cìdi ànu cyàmba ne mu Dyulu mùdi babàka batekète bàdi bóbò abu bàleeja, mu Dyulu. “Ntentà wa pa buloba ewu yèyè munyangùke, tudi ne mukwàbò Mwàmwa.”

227 Wèwè mumòne muntu wibila, wiba, ùshima, vùlukà ànu ne, citùpà cyèndè ncindile mu iferno, cimwindile yèyè, mwaba wèndè wikalàye mwa kukèngeshiibwa mu Bwikadi bwa Nzambi ne Banjèlò bàà cijila, ku kapyà ne soufre. Neàkèngeshiibwèmu. Kaciyi bwa kashidi to, kèna mwa kukèngeshiibwa bwa kashidi to, kashidi kì mbwena kwamba ne mbyònsò, bwa bikondo byònsò to. Cyendèlèèlè nkashidi, Cyendèlèèlè cidi...kacyèna ne ntwàdijilu anyi ne ndekeelu to. Kàdi *kashidi* n “cipòdòlò cyà cikondo.” Bible mmwambè ne: “Kashidi ne,” mutwàngaji, “kashidi.” Yona wàkamba mùvwàye “kashidi” mu difù dyà mushipa wà bàlenà. Ncìpòdòlò cyà cikondo.

228 Kàdi, tàngilàayi, kùdi Mwoyi wà Cyendèlèèlè ànu wùmwèpelè, kì wà Nzambi awu. Nènku piikalàbi ne neùkèngeshiibwè bwa kashidi, ne kùyikù mwa kufwà to, apu’s udi ne Mwoyi wà Cyendèlèèlè. Kwèna mwa kukèngeshiibwa bwa kashidi to...Udi mwa kukèngeshiibwa munda mwa bidimu mùllyò mujimà, mu Bwikadi bwa Nzambi ne Banjèlò bàà cijila, ku kapyà ne soufre. Ncyèna mumanyè ne nntàntà bule kaayi wudi mulongolola to. Kàdi kumanakumana’s necikafikè ànu ku ndekeelu bwalu cìvwa ne ntwàdijilu. Ne Nzambi nkàayèndè ngudi ne Mwoyi wà Cyendèlèèlè. “Ewu udi utèèleja Mèyi Àanyi, ne wìtabuuya Yèyè udi muNtùme,” kèna ne mwoyi *kashidi* to, “ùdi ne Mwoyi wà Cyendèlèèlè.” Mwoyi wàkabangà awu, kì ncintu cyà *apa* to. Kàdi ntoo ne kuulu Kwàka, Mwoyi wà Cyendèlèèlè, *Zoe*, Mwoyi Sungasunga wà Nzambi ngùdi wùpweka wùsòmbela munda mwa muntu, ne yèyè ngwa Cyendèlèèlè pàmwè ne Nzambi, ne kèna mwa kufwà to. Ki cidi Diyì dyambè.

229 Anjì elààyikù ànu meeji pa bwalu abu. Kùdi Myoyi ya Cyendèlèlèlè yìbidì anyi? Kwèna mwa kwandamuna alu lukonko to, mmwômò anyi? Kùdi Mwoyi wà Cyendèlèlèlè wùmwèpelè, ne mwinè awu m'Mwoyi wà Nzambì. Mùshindù mukwàbò wà mwoyi ewu, nànsha mwikàle cinyi, wùdi ne ndekeelu wawù. Ne cyònsò citù ne ntwàdijilu eci cidi ne ndekeelu. Kàdi cyònsò citùku kaciyi ne ntwàdijilu kacyèna ne ndekeelu nànsha. Ne Nzambì mmwambè ne neÀtùpèèshè Mwoyi wà Cyendèlèlèlè, kawùyi ntwàdijilu to, twètù tuvwa ànu bavwijìbwe citùpà Cyèndè. Ne mu bushùwà bwa bwalu Mwoyi wùdi munda mwètù ewu, kawùvwa mutwàla pànu kùdi ngiikàdilù wa buntu to. Bufùki mbutùpèèshe nyuma kampànda, kàdi awu nyumà mmufwè, nènku tudi bapetè Nyumà wa Nzambì. Butùmbì kùdi Nzambì's wè!

230 Nzambì ùvwa muntu anyi? Cya bushùwà's. "Twènzààyi muntu ku cimfwànyì Cyètù Sungasunga." Nzambì ùvwa cinyi? Tèòfànì, mubidi kampànda. Nènku kwòkù aku muntu wàkenjiibwa nànkù awu ne kutèèkiibwa mu budimi amu. Kàdi kakùvwa muntu bwa kudima buloba to, mu byumvwilu amu. Pashiishe kufùkaYè muntu ku lupwishi lwà buloba, mu mwoyi wà nyama, ki muntu awu kudimayè buloba. Kàdi muntu awu kudishindayè, ku dishipa dya mikenji. Menemene's. Ki Nzambì, Tèòfànì awu, kutùuluka e kuvwijìbwa musunya ne kusòmbela munkaci mwètù, bwa kupikula muntu awu.

231 Pa nànkù kí ncintu nànsha cìmwè cyùvwà wèwè mufwànyine kwenza to. Wèwè udi ngènzàmpèkàatù, ànu kwònsò aku. Udi mufwimba mu bubì. Udi mulela mu mpèkaatù, mulwè pa buloba mwikàle wamba mashimi. Udi mulela pa buloba apa ku dijinga dyà disangila dyà tatwèbè ne mamwèbè. Ne wèwè udi ànu mu njila mutàngile mu iferno ne mwèbè mwònsò, cyùdi wenza nànsha ciikàle cinyi. Udi mufwànyine kwikala kùyikù ushima, kùyikù wiba to; ulama díyi ditùma dyònsò, ne bikwàbò byònsò; kàdi neuye mu iferno, ànu mùdi kandìndì kàya ku diswa dyàkù amu. Kàdi mùshindù wùmwèpelè wùdiku mwa kwikala cyàkàbìdì ne mwoyi, ngwà kwitaba Nyumà Mwìmpè, Mwoyi wà Cyendèlèlèlè wà Nzambì awu.

232 Cidì cikuvwijè cyùdi aci ncinyi? Ku cibangidilu, Nyumà Mwìmpè pàakalààdilàYe buloba, kapàvwakù cintu nànsha cìmwè to ànu difùkuka dya volcan. Kalòngò kakesè kàa Paasàkà kutòlokakù. Nzambì kwambaYè ne: "Aci cidi cimwèka cilenga. Tùngunukà ànu ne kulààdila." Bilòngò kutòlokabì. Mashindà kutòlokawù. Mici kutòlokayì. Nyuunyi kubùükayì yipàtukila mu lupwishi. Nyama kujúukayì. Muntu kujúukayè.

233 Mpindyewu, byàkenzeka bishi? Ku dilààdila dya Nyuma Mwìmpè adi, ùkùngwija bintu ebi pàmwè, binshidimba, kàlisiyumù; wènta bilòngò, wènta nyama, ùkwenza wèwè.

<sup>234</sup> Nènku mpindyewu, udi ne disungula dya mudilekèlèlè. Nzambi ùkulàadila cyàkàbìdì, wàmba ne: “Udi mutèèlèje Dìyì Dyànyì dyà mukana anyi? Kùpapishi mwoyi wèbè nànsha, bu mu matùkù a diyòbola awu.” Ki Yèyè udi utùùluka ewu, ùyiisha Dìyì.

“Èvànjeeliyò wàkabàyiishabò kàvwa...kàvwa ne diitabuuja munda Mwèndè to, pa nàнку Kààkabàkwàcishakù to.” BààkaMutèèleja, kàdi kabààkaMwitabuuja to.

<sup>235</sup> Nzambi kutùùlukaYè. KubàleejaYè Dikunji dyà Kapyà. KulèèjilaYè ku mupròfetà Wèndè, bimanyinu ne maalu a kukèma ne, Úvwa nendè yèyè. Bòbò kabààkaCìitabuuja to. Kaa, bàvwa banangè kumòna bishimà. Bàvwa banangè kutèèleja mupròfetà. Kàdi bwa diCìitabuuja, aci to. Nsòmbelu yàbò yidi yijaadika ne kabààkiitabuuja to.

<sup>236</sup> “Mpindyewu,” mwàkambàYè, “kanùlondù cileejilu cìmwècìmwè cya bupidyà aci to.” Bwalu mu ditùkù dya ndekeelu edi, kùdì èkèleeziyà wa bàà Bisàmbà bya bendè, Nzambi mmumwènèke cyàkàbìdì; cìmanyinu cìmwècìmwè aci, bwalu bwa kukèma bùmwebùmwebè abu, Dikunji dyà Kapyà dìmwebìmwebè adi, bishindìkìùbwe, bijaadìkìùbwe. Katùpapishi myoyi yètù bwa kupòna mu diteeciibwa dyà kale adi to, dyà bupidyà adi, bwalu netùbolelè pa buloba ne bwalu bwònsò pààbù bütùuka.

<sup>237</sup> Nènku pàdì Nyumà Mwímpè ùkookola ku mwoyi wèbè, [Mwanèètù Branham ùdi ùkookola pa cyambilu—Muf.] “Paanyimà pàà ntàntà buleyì mùshindù ewu, wèwè mutèèlèje Dìyì Dyànyì, kùpapishi mwoyi wèbè to.” Wàmba ne: “Mwan’Àanyì, ki Bulelèlè mbwebù.” Kanùtàngidi mùsànjeelà to. Tèèlejaàyi Mukenji. NùWitàbùùjè. “Kùpapishi mwoyi wèbè to, bu mu matùkù a diyòbola awu.”

<sup>238</sup> Pàdiye ùtèleja Dìyì Dyèbe: “Kùpapishi mwoyi wèbè to.” Dìbà adi udi wamba ne: “Èyowà’s, Mukalenge, ndi ngiitabuuja.” Apu udi ubwela mu Mwoyi, Nyumà Mwímpè ùdi ùbwela munda mwèbè. Nyumà webè wa kale awu ùdi ùfwa, utu ukufikisha ku dyalakana ne ku dikinangana, ne ku budimù ne ku lukunà, ne—ne ku lukinu ne ku bintu byònsò abi awu, ùdi ùfwa. Ne udi ulwa mùle tètè ne dinanga, disànka, ditalala, diikisha. Mpeepèlè nànsha mituutè bishi, byònsò mbimpè.

Lwongò lwànyì ndukwàte munda mwa cilàmbà-cikùdika.

Mu dipicila dyà mu cipeepèlè cìkolè cyònsò cyà mvùla wa cipùpù,

Lwongò lwànyì ndukwàte munda mwa cilàmbà-cikùdika.

Bwalu pa Kilistò, Lubwebwe lushindàme, mpàndì mwimàne;

Myaba mikwàbò yònsò nduntekà.

239 Ki bwalu mbwabù's. Eddie Perronet, pàvwàye ùfùnda musambu mwendè luumù awu. Myaba mikwàbò yònsò, màngumba ònsò, twitabàayi yònsò, malongesha ònsò, bìdi bìjìmina. Kilistò!

Wèwè udi wamba ne: "Ee, mèmè's ndi mumanyè Bible." Kwèna ne Mwoyi ku dimanya dya Bible adi to.

"Ndi mumanyè kàtèshismù kàanyi." Kwèna ne Mwoyi ku dimanya dya kàtèshimù kèèbè aku to.

"Ee, mèmè's ndi mwena Kilistò." Kwèna ne Mwoyi ku dijìkula dyà bwena Kilistò adi to.

240 Udi ne Mwoyi nku diMumanya Yèyè. Paùdi uMumanya Yèyè, mpaùdi ne Mwoyi. "Dìbà adi udi ubwela mu Diikisha Dyèndè. Udi ulekela midimu yèbè, mwàkalekelà Nzambi Yèndè." Udi uvwijilbwa mwànà wa balùme wa Nzambi, mwabanyanganyi wa Nzambi. Ne byòbì ne—byòbì ne Nyumà Mwimpè awu ùdi ùkwambisha, ne wèwè wambisha pèèbè wamba ne: "Èyowà's, Mukalenge," anyi ùkwambisha wèwè's.

241 Wàmbisha ne: "Lwàyi kùNdi, nwènù bònsò bàdì bàkwàta mudimu mukolè ne bambùle majitu makolè. Mèmè nènnpèèshè Diikisha."

242 Ne wèwè wamba ne: "Aa, mèmè ncidi mwànà. Ndi ne... Kaa, wanyì mpaasàtà kèna...Cyònsò cidì cikèngelà mèmè kwenza... " Nwamònu anyi? KwàdyàkuMupetakù to.

243 Kàdi wèwè mwambè ne: "Èyowà's, Mukalenge wanyì. Ndi muumvwè Dìyi Dyèbè. Ncyèna mpapisha mwoyi wanyì to. Nànsha bìshi, Mukalenge, Cìdi n'Dìyi Dyèbè ne mèmè ndi nKwitabuuja. Ngangàteku, Yesù: 'Ànu mündì emu, ncìyi ne cyà didilumbulwila naaci nànsha cimwè, ànu Mashì Èbè àkeediibwà panshi bwanyì mèmè. Ne mwaba awu ndi ndaya ne: "Nèngitabuuje." Èyi Mwànà wa mùkòòkò wà Nzambi, ndwàlwa." Tentèkà byanza byèbè pa mutù Wèndè wùdì wùpùnga ne lufù awu, wamba ne: "Mukalenge, mèmè ndi ngènzàmpèkààtù, kàdi Wèwè ngwambiikidi."

244 "Yònsò udi Taatù muMpèeshe nealwe kùNdi, ne Mèmè nèmubùishè ku lufù ku matùkù a ndekeelu."

245 "Èyowà's, Mukalenge, ndwàlwa. Ncyèna mpapisha mwoyi wanyì to, bu mwàkenzàbo mu diyòbola amu, mèmè ndi bulelèlè ngiitabuuja."

246 Dìbà adi Yèyè ùdi wènza cinyi? Ùdi ùkupèèsha Mwoyi Wèndè, Zoe, Mwoyi wà Cyèndèlèlè. Kàdi piikalàbi ne Nzambi mmutùjuulè ku lupwishi lwà buloba, kutùdì bafùme aku... Tudi bafùme ku lupwishi anyi? Byònsò binùdì numòna abi, mbifùme ku lupwishi. Ne piikalàbi ne Nzambi ùvwa mwa kumvwija cìndì leelù ewu eci, mèmè ncìyi ne disungula nànsha òmwè to; ànu bwalu dijìnga Dyèndè òvwa dyà kumfùka, ne kumpèèshakù mpùngà wa kukùngamangana ne Kàlvaryò bwa

mémè kwangata dipàngadika; ne mémè kwangata dipàngadika ne kuMwitabuuja; ambààyaaku tǔng mwàbèngàYe kumbiisha ku lufù! Pìikalàbi ne Yèyè mmumvwijè cindì eci, ncìyi ne disungula dyenza to, pashiishe mémè kwenza disungula ne kuMubweja munda mwányi; pàakatèèkàYe byanza Byèndè Yèyè mwinè, ne kudicìpa ku Yèyè mwinè ne, Ûwwa mwa kumbiisha ku lufù mu ditùkù dyà ndekeelu. Mémè's nènngiikalè ne ditwishiibwa.

<sup>247</sup> Ndi ne Diikisha, kî mbwalu ndi nkuukwila mu dyàlumingu to, kî mbwalu ndi nkuukwila dyà nsabatu to. Abi kabyèna ne dipetangana naadi to. Ndi nkuukwila bwalu ndi mubwelè mu ditalala ne Diikisha Dyèndè: ditalala, diikisha, dinanga, disànka. Mvùlà ya bipùpù yijookè; lwongò lwányi ndukwàte.

<sup>248</sup> Udikù ne dilabula adi, dilòòlò edi anyì, wèwè mulundà wanyì udi musòmbe kaaba aka mu tabernacle wa luuyà lukolè ewu? Kwèna mulwè bwa kuntèeleja mémè to. To. Udi mulwè bwa kutèeleja Dìyi. Tèèlejaàaku, mulundà wanyì.

<sup>249</sup> Mpindyewu pawikalà kùyi ne Diikisha adi to, udi mwa kuDipeta ànu patùdi twakulangana apa. Kabyèna bikèngela bwa wèwè kulwa ku cyoshelu eku nànsha. Shààla musòmbe ànu mwaba wùdi awu. Ikàlà ne meeji matòòke, ne ambà ne: “Kilistò, akùlà ànu ne mwoyi wányi. Ndi mumanyè ne kùdi luuyà lukolè. Ndi—ndi mémè yònsò mufwè naayi, mukòpàkàne. Ndi mu bwalu bukolè be. Kàdi, Mukalenge, bulelèlà, bìdi mwa kwenzeka ne nkopakanè bwa lutàtu, lubi kutàmba elu, pàmbàbu kucyà mu dindà.”

Ne ngàngàbukà ùdi mwa kukùpa mutù, kwamba ne: “Ndisaamà dyà mwoyi. Bwèndè mbutùùke.” Bwalu nebwikalè cinyi dîbà adi?

<sup>250</sup> Bwalu nebwikalè cinyi dîbà adi? Pàabuuludiibwà Mukàndà munène awu, bwalu nebwikalè ncinyi dîbà adi? Nukàadi buumvwè musambu awu wà ne *Bwalu Nebwikalè Cinyi Dîbà Adi*? “Bàdi babènge Mukenji abu, pàabàkonkàbo bwa kufila kabingilà, bwalu nebwikalè cinyi dîbà adi?” Bwalu nebwikalè cinyi dîbà adi? Elà meeji ku bwalu abu mpindyewu, mu ndòndò menemene.

<sup>251</sup> Patùdi twinyika mitù yètù apa, elà meeji ku bwalu abu.

Pìikalà udi ubènga Mukenji ewu dilòòlò edi awu,  
Pàamukonkàbo bwa kufila kabingilà, bwalu nebwikalè cinyi dîbà adi?

Bwalu nebwikalè cinyi dîbà adi? Bwalu nebwikalè cinyi dîbà adi?  
Pàabuuludiibwà Mukàndà munène awu,  
bwalu nebwikalè cinyi dîbà adi?

Piikalà bàdi bàbènga Mukenji ewu dilòòlò edi  
 abu,  
 Nebànùkonkè bwa nwênù kufila kabìngilà,  
 bwalu nebwikalè cinyi díbà adi?

<sup>252</sup> Taatù wa mu Dyulu, byònsò ebi bìdi mu byanza Byèbè mpindyewu. S'ki Nsabatu mulelèlè ewu mutèèka kumpàlà kwà bantu. S'ki Mwanjèlo wa Nzambì nyewu, mu ndambù wa bidimu bikesè byáshàadi ebi, mmutuutè dikùbàkùbà pa buloba bujimà. Badyudi ne bakwàbò bònsò, mbateetè kuCìpiisha. Kàdi, musangu wònsò, Udi ànu ujaadika ne Wèwè udi Nzambi.

<sup>253</sup> Beena maalu a mamanya, bukwàèkèleeziyà; mbampofò anyi's, Mukalenge? Kùdi pàmwàpa muntu kaaba aka dilòòlò edi udi muswè kupeta lumònu lwèndè, bwa kutùngunuka ne kwenda, kàdi kàyi ùteeta Nzambi to, mwàkadibi mu matùkù a diyòbola awu; kàyi ùteeta kuMuteeta, pa kwikala mwimpè mu dyàlumingu, anyi mu kuneemekela ditùkù kampànda, anyi mu kutùmikila kwà twitabàayi kampànda, anyi mu kwikala wa mu èkèleeziyà kampànda to. Kàdi muswè kupàtukamù ne kwikala mutengùdiibwe, mu mwoyi, ne kupeta Nyumà Mwimpè. Ne ùdi ùMujinga. Ku diitabuuja mpindyewu, ùdi ùteeta bwa kuMwitaba mu mwoyi wèndè. Ùdi ùteeta bwa kupetakù ngàsà kÙdi, Mukalenge.

<sup>254</sup> Kaa, yèyè's ùdi mwa kwikala mwakùle mu myakulu. Mmufwànyine kwikala mwelè mbilà. Ùcidi ne ciji ànu cyòci cimwècimwè cya kale aci. Ùcidi ne budimù ànu bwòbù bùmwebùmwe bwa kale abu. Ùcidi ànu ùlòla myandà ne ùlàbakana, ne wènza bintu bìvwà kabìyi bikèngela bwa kwenzayè to. Kì mmuswè nàнку to, Mukalenge. Bwalu nebwikalè cinyi díbà adi, pàbuuludiibwà Mukàndà munène, wùdi mwambè ne: "Wa nàнку kàakubwelakù mu Bukalenge to" awu? "Kì bwa cinyi ikàlaayi bapwàngàne, mùdi Taatù wenù wa mu Dyulu mupwàngàne." Cyònsò cidi kaciya cipwàngàne kacyakubwelàmù to. Yèyè yònsò, dilòòlò edi, mmweyemène wàkapoopèdiibwa pa nkùrusè awu anyi? Kabiyi nàнку to, Mukalenge, swàku bwa àmbè "èyowà" wa Cyendèlèlè awu ànu mpindyewu.

<sup>255</sup> Ambà ne: "Mukalenge, ndi... Kì ndisaluka to, kàdi ndi ngumvwa ànu Cintu kampànda munda mwa mwoyi wànyì ne, Cintu kampànda cidi cingambila ne: 'Ndi mwa kwenza nàнку mpindyewu mene, ku ngàsà Webè.' Ne ndi mpindyewu nKwitaba bu Musùngidi wanyì sungasunga. Ndi—ndi mbènga bintu byònsò byà pa buloba, ne ndi muswè kubwela mu Diikisha Dyèbè. Ne ndi mwitabùuje ne ndi ncyènza ànu mpindyewu mene. Ndi ngiitabuuja ne Nyumà Mwimpè ùdi munkaci mwa kumbweja buludì mu mwaba awu."

<sup>256</sup> Pàcidi mutù wònsò mwinyika apa. Kùdikù muntu ùdyùm vwa mùshindù awu mpindyewu mene anyi? Elà cianza

muulu ne: “Nyumà Mwîmpè ùdi mpindyewu munkaci mwa kumbweja mu mwaba wûngiikalà nciyi kàbìdì nndòla myandà to.” Nzambi àkubènèshè. “Ncyàkwenza bintu abi to. Ciiyi cyànyì cyàyi. Ndi mwa kwikala ne nsòmbelu wa ditalala ne disànka ne mwoyi mule, kubangila ànu ku mpindyewu mene. Ndi ngiitabuuja ne Nzambi ngudi wakula naanyi mpindyewu mene ne, ndi mwa kucyènza kubangila pa díbà edi, ku ngàsà Wendè.” Nudikù mwa kwela byanza muulu anyi? Nzambi ànùbènèshè. Nzambi àbeneshè nsongàakàjì awu. Kùdikù mukwàbò muntu anyi? “Ndi mpindyewu ngiitabuuja.”

257 KanùMuteeci to, bu mu ditùkù dyà diyòbola. Kanwèdi meeji ne mbwalu tutu tuya mu èkèleeziyà mu dyàlumingu, anyi tuneemekela nsabatu to. Pòlò mmwambè ne: “Nwènu bàdì bàneemekelà matùkù anyi ngondo, anyi ne bikwàbò, ndi nnùmwila bwòwà. Bu mùdìbi ne mikenji yìvwa ne mundidimbì wà bintu bìmpè bicìlwalwà, ne kayiyi cimfwànyì mene cyà cintu aci to, kayènakù mwa kuvwija mukuukwidi mupwàngàne to.” Kàdi Kilstò ùdi ùkuvwija mupwàngàne, mupwàngàne ku mèsù kwà Nzambi. Yèyè ùdi ùmusha mpèkaatù webè, ùkuumusha dipiila, ùkupèesha dinanga ne disànka Dyèndè.

258 Udikù muswè kubwela mu Diikisha mpindyewu anyi? Muntu mukwàbò èlèku cyanza muulu, àmbè ne: “Ngénjì nànkù.” Nzambi àkubènèshè, wèwè nsongàakàjì, udi ku dyàbakàjì dyànyì eku ewu. Nzambi àbeneshè muntu mulùme udi musòmbè ku dyàbalùmè dyànyì eku ewu. Bwa kubwela mu Diikisha Dyèndè, elàngànàpu meeji mpindyewu mene.

259 Sambilà ne: “Ànu mùndì emu, Mukalenge, nciyi ne cyà didilumbulwila naaci nànsha cimwè to; ncyèna mene mwîmpè to. Ncyèna ne cìndì mwa kuKulàmbula to, ànu nsòmbelu wanyì wa kale, musùnsùke, wa mpèkaatù ewu. Udikù mwa kungaakidila anyi? Kunkezula? Kungiikishisha? Bwalu, ngàalayì ne nèngiitabuuje. Éyi Mwànà wa mùkòòkò wà Nzambi, ndwàlwa. Ndwàlwa mpindyewu, mwikàle ngiitabuuja mpindyewu ne ndi muumùke ku lufù muyè ku Mwoyi. Bwalu, apa mene mu nkwasà wanyì ewu, ngààKwitàbi bu Musùngidi wanyì ne ngùmvù ditalala mu mwoyi wanyì.”

260 Bantu bàtaanu mbeelè byanza muulu. Mukwàbò, udi udyùmva mùshindù awu, ùdikù mwa kwela cyanza muulu anyi? Wèwè kùyì mwena Kilstò to, Mwitàbè ànu mpindyewu.

261 Wèwè ujikula mùdì mwena Kilstò kàdi kùyì wa mùshindù awu to, ucidì ànu ngènzàmpèkaatù, nsòmbelu úkaadiku—úkaadiku nendè nànsha mwikàle wa bishi, anyi mùdì uteeta wèwè mwine kudìvwija nànkù. Cyùdì wèwè wenza aci kí nciitàbiibwekù to. NcìdìYè Yèyè mwenzè. Bwakànè bwèbè wèwè mwìnè kabwàkwitabiibwakù to. Wèwè mulekèle kunwà kwà mfwankà ànu bwalu udi mwambè ne: “Ee, mbìmpè ndekele



kunwà mfwankà bwalu ntu njikula bwena Kilistò,” Nzambi kèna ùcìitabakù to. Wèwè mulekèle kwalakana bakàji, ànu bwalu udi udyènzeja wèwè mwinè bwa kucilekela, Nzambi kèna ùcìitabakù to. Aci’s ncintu cyùdì wèwè wenza. Abi mbyenzedi. Ngàsà ngudi ukusungila. Nzambi mmulwèku kùdì mukumùshe cintu cyònsò mu kaabujimà anyì? Ki cintu cìdì cìlondà ncyòcì aci.

262 Wèwè udi wamba ne: “Nkàadi mukashàale wa mu èkèleeziyà, pa nàнку kunkèngelabi bwa mèmè kulekela bintu abi.” Nzambi kî mmwitàbe aci to, kakwèna cyùdiku mwa kulàmbula to. Yèyè ùdi wìtaba ànu cìdì Kilistò mufile. Yèyè ùdi ùkupèèsha Mwoyi wà Cyendèlèèlè, kàdi ùkuumushaci. Udikù muswè kuWàkìdila anyì?

. . . pambèlu pàà mbù mutuuta kùdì cipeepèlè  
cicolè, mutombòke,  
Lwàku, elà lwongò lwà musùùkà wèbè mu  
mwaba mutalàlè wà diikisha,  
Wámbe ne: “Munanga wanyì ngwanyì mèmè.”  
Ngèdì lwongò lwà musùùkà wànyì. . .

Éyo, nudi mwa kubàndulukaayi. Diiyiisha dyàjiki mpindyewu. Tùkuukwilàayi ànu cyanààna mpindyewu.

Ncyàkwendelakù kàbìdì ne màzuwà pa mbù  
mutombòke to;  
Cipeepèlè cicolè cìdì mwa kutuuta pa ndòndò  
mutombòke, wa mvùlà yà cipùpù,  
Mu Yesù mèmè ndi mu dikùbiibwa bwa  
kashidi.

263 Bantu bònsò mpindyewu, mu dikuukwila.

Ngèdì lwongò lwà musùùkà wànyì mu mwaba  
mutalàlè wà Diikisha (Nsabatu)  
Ncyàkwendelakù kàbìdì ne màzuwà pa mbù  
mutombòke to;  
Cipeepèlè cicolè cìdì mwa kutuuta pa ndòndò  
mutombòke, wa mvùlà yà cipùpù,  
Mu Yesù mèmè ndi mu dikùbiibwa bwa  
kashidi.  
Nkenkèshilèku, . . .

Dilekèlèlaayi ànu cyanààna. Bwitàayi kwisù. Nudi bumvwè Nyumà wa kalolo awu anyì? Ki dikuukwila ndyòdì adi. Diiyiisha dyàjiki. Eci ndikuukwila.

Enzàku bwa Bukènkè bwa ku kaleyi  
bùnkèkèshilè,  
Éyì nkenkèshilèku, Éyì Mukalenge,  
nkenkèshilèku,  
Éyì enzàku bwa Bukènkè bwa ku kaleyi  
bùnkèkèshilè,

<sup>264</sup> Mbanganyi bàdiku bàdyùmvwa bîmpè menemene? Elà cyanza muulu. Nyumà wa kalolo, wa didipwekesha awu, ki Yèyè awu's.

Kwikala bu Yesù, ànu kwikala bu Yesù,  
 Pa buloba ndi njinga bwa kwikala bu Yèyè;  
 Mu lwendu lwònsò lwà mwoyi kuumukila pa  
 buloba too ne ku Butùmbi,  
 Ndi ndòmba ànu bwa kwikala bu . . .

Kuukwilaayi ànu cyanàànà.



*EBÈLÙ, NSHAPÌTÀ MWINÁYÌ* LUA57-0901E  
(Hebrews, Chapter Four)

DILONDANGANA DYA MALONGESHA PA MUKÀNDÀ WÀ EBÈLÙ

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyàlumingu dilòlò, mu ditùkù 1 dyà ngondo wa citèemà, cidimu cyà 1957, mu Branham Tabernacle mu Jeffersonville, Indiana, U.S.A. Ndyumusha pa mukaba wa mēyì ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2022 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)